


# NKONKO NÈ MANDAMUNA

 Mwoyi wènú awu dilòlò edi, balundà bàànyì. Mwwa nyiikilangana ànu nè mpaasàtà wetù munanga, mwanèètù. Ndi...Ndi ngèèla meeji nè kùvwa bàmwè bàvwà bàshààle biimàne bàmvwà nciyi mwangà to; mwwa mushiikile nciyikù mwà kuya kule kupìta apu nànsha. Ekèlekèle, ndi musùnsula kùdi bikèèna-kumòna. Nwamònu anyi? Nè bìvwa byàbùngì, bitwè ku dikùmi nè bitaanu anyi makùmi àbìdi mu mapingaja emu, nènku abi's bìdi bìnsùnsula. Ndi ànu ntèèja katùpà kakesè apa nè pààpa. Mémè kupàtuka; mémè kwamba nè: “Mwanèètù Neville, bu—bu wèwè mwà kutùngunuka, tùngunukà's; ndi muswè kudifinda kuyaku kumbèlu.” Mémè nè: “Nkààdi ànu ngàmba kudishinda, nànsha mene mwoyi wànyì wùdi wùtuuta tükùtükù, wùtùpika.” Ke mémè nè: “Ndi—ndi...ncicyèna kàbìdi mwà kwimana to.”

<sup>2</sup> Yèyè nè: “Mwanèètù Branham, bantu's bàvwà munkaci mwà kunkonka ní udikù mwà kujikija dyandamuna ku nkonko ayi.” Nènku ncyèna—ncyèna—ncyèna muswè kupangila pa mwaba wànyì wà mudimu. Ndi ngàanyisha Mwanèètù Neville. Nènku pàmwàpa bwà tusunsa tukesè cyanààna nèngènzè nè mwànyì mwònsò. Nènku ndi—ndi mumanyè nè kùdi...Billy mmulwè mwaba awu; mémè kwamba nè: “Udi mubàbwejè mubàjikije bònsò anyi?”

<sup>3</sup> Yèyè nè: “Papa, s'kùdi bantu makùmi àbìdi anyi bapite apu biimàne—biimàne mwaba awu.” Pa nànku ncivwa mwà kupeta...Abu's mbantu makùmi àsàtù bajima leelù ewu, nè bikèèna-kumòna bitwè ku makùmi àbìdi nè bitaanu; pa nànku nudi mwà kudifwànyikijila mshindù úndi. Pa nànku ndi—ndi mucyòke ànu byà menemene, mucyòke menemene mu lungènyì. Kàdi netùsambilè, tutwàdija nè nkonko eyi pa mwaba utùvwà bashiile. Nènku pashiishe pàndi...Mémè muyè ku Arizona nè bintu ebi mu meeji àànyì, nèntacishiibwè díbà dyònsò. Nèngàalukilè àbìdi àdi panshi aa, bu Mukalenge mwà kwanyisha, nè kwakula pa cyena-bwalu dīngà ditùkù nè lùkàsà lwònsò, pa bujaalàme bwà dibàkà nè difwà dyà dibàkà. Tùsambilàayi.

<sup>4</sup> Nzambi munanga, Wèwè udi mumanyè mwoyi wànyì, nè Udi mumanyè njiyà yànyì; Udi mumanyè byònsò bwà bwalu bwànyì. Nènku ndi ndòmba, Nzambi; kùdi bantu bààbùngì...Ndi ànu mbàlekela bàya ntàntà mupitèpìte bule, Mukalenge; bàdikù bùngì butàmbe. Kàdi ndi nè kusàkidila kwàbùngì bu mùndi nciyi ngiitabuujà nè kùvwa kampàndà udi mulwè leelù ewu udi kàyì mukwàcishiibwe. Ndi ngiitabuujà nè yònsò wa kùdìbo mmupàtùke nè disànka nè musànkishiibwe. Bintu bìmvwà nciyi mwà kwandamuna mémè nkààyaanyi, Wèwè è kulwa mu

bikèènà-kumòna nè kubuulula bivwà mu nsòmbelu yàbò kale (mbasòmbè kaaba aka, bààbúngì bàà kùdìbo, mpindyewu mene munkaci mwà kucitèèleja nè kumanya nè mbulelèlè), nè udi mubàbulwila bintu bivwàku kale wàwa mu nsòmbelu byàkènzà nè bintu abi byènzèkè. Mbamanyè, Mukalenge. Kakwènakù mùshindù nànsha wùmwè pa buloba bwà mèmè kumanya aci kòkù kakùyì dikwàcisha Dyèbè to.

<sup>5</sup> Nènku ndi ndòmba, Taatù wa mu Dyulu, bwà nè nànsha mèmè mucyòke, kàdi ndi nè disànkà dyà kwikala musadidi Webè. Nènku ndi ndòmba bwà Ùbeneshè aba bàvwà biimàne mwaba awu, bààbúngì bàà kùdìbo bàvwà baswè kubwela abu. Nè ndi—ndi—ndi nè dyeyemena, Nzambi, nè nebiikale—nebàtàngile bwalu bwàbò, Nyumà Mwímpè Webè munène awu neàbàpèèshe cyònsò cidìbo naaci dikèngela aci.

<sup>6</sup> Nkwàcishèku bwà kujikija nkonko eyi, Nzambi munanga, anyi kwenza nè mwànyì mwònsò múndi mwà kupita naayi amu, bwà nkonko yà bantu Bèèbè yàmònakù mwà kwandamunyiibwa. Mèmè mwà mubàlòmbè bwà kuyifùndabò. Bòbò mbayifunde, nè ndi ndyùmvwa mwenzèjùbwe bwà kuteeta kubàndamwinayi. Pa nànkù ndi ndòmba bwà Wèwè kumpà dikàndà bwà ngaamònakù mwà kuKwenzela nè kwenzela bantu cìndi nè cyà kwenza. Mu Dìnà dyà Yesù mmùndi ndòmba emu. Amen.

<sup>7</sup> Mpindyewu, netùbangilè buludì mwaba wutùvwà bashiile mu dindà emu awu. Yimwè yàà ku yòyi eyi ndi mufwànyine kupanga mùshindù wà kuyibala, bwalu bwà. . . Dìyì ndimpàte ndambù, bwalu ndi mwakùle byàbúngì be. Mbanganyi bàvwà mu dijingulula dyà meeji leelù ewu bàdi baanyisha Nzambi menemene bwà mùdìYe munùpèèshe cinùvwà. . . ? Nwamònu anyi? Adi's ke didi ditàmbe bulenga ku ònsò aa, ngòwò masangisha àà mùshindù awu. Bintu byùdì muswè kumanya nè bintu bìdì bisokoka mu nsòmbelu bìdì bibuulùdiibwe nè byambiibwe.

<sup>8</sup> Nènku—nènku vùlukàayi nè, byàbúngì byà ku bintu ebi. . . Mpindyewu, bààbúngì bàà kunùdi mbamanyè nè ncyà bushùwà menemene kùdi bintu byà bitàcisha bivwà byambiibwe nè byediibwe patòòke, kàdi muntu nànsha umwe kí mmubimanye to pa kuumusha mèmè nè Nzambi. Nè cìvwàbo bakwambile wèwè aci, cidi nè cyà kwikala ànu pankaci pèèbè wèwè nè Nzambi; cilekèle ànu cyanàànà. Nènku. . . Mbanganyi bàà kunùdi bàdi bamanyè nè Mukalenge wàkabuulula bintu bivwà. . . bivwà byènzèke, bwà kukupèèshabi dikwàcisha? Elàayi byanza byènu muulu piikalàbi nè bivwa nànkù. Nwamònu anyi? Nciyi nànsha mumanyè bantu to, kantu nànsha kàmwè pa bìdì bibàtàngilà to, kàdi Yèyè—Yèyè ùvwa mubàmanyè.

<sup>9</sup> Mpindyewu, tùfikàayi ku nkonko nè lùkàsà lwònsò mpindyewu bwà tùmone ní tudi mwà kupeta. . . Kùdi lukwàbò kàbìdì lùdì kaaba aka mwaba kampàndà. Lùdì lwàmba nè:

“Nombà isàtù.” Ngèèla meeji nè mmukàndà mumfùndila; ncyà bushùwà, mmukàndà mumfùndila. Nùmfwilaayikù luse. Nényitèèkè kaaba aka pàndi ndwa kùdìyi apa, nè ndi ngèèla meeji nè. . . Èyowà’s, mukalenge, eci mmukàndà mumfùndila kàbìdì. Nè ùdì wàmba nè: “Lukonko,” kàdì ndi ngèèla meeji nè mmukàndà, lukonku lwela mu mukàndà mumfùndila. To, kí nnàнку to, ndukonko lùdì lùtàngila cilòòtà. Èyo, nêmbalè cilòòtà aci, nè pashìishe nêmmònè Mukalenge ní wàmpèèsha dyumvwija dyàci, nènku nênnùsambùlùjilèci mèmè nè mùshindù. Ndi ncinka nè nudi nè mwaba wunùdì nusòmbela. Tùmonèbì túng ní bìdì nàнку; byòbì kabìyi nàнку to, nênnulòmbè bwà nwènú kufùnda mwaba wunùdì nusòmbela, muntu udi mwelè lukonko elu nè—nè mulòòte cilòòtà eci. To, kwèna muleejè mwaba to.

<sup>10</sup> Ní nganyì yònsò udi mufùnde mukàndà ewu (lùdì ànu nè. . . ndufùndila ànu mèmè), pèèsha Billy mwaba wùdì musòmbèle awu, nènku pàncidì ntùngunuka nè njila ngènda nya mutàngile ku Arizona apa, nêmbwelè mu cipèèlà bwà kusambila. Nènku Yèyè mumpèèshe dyumvwija, Nêmmanyè kaaba kàà kudifùnda (nwamònu anyì? Cyòci kacìyi nàнку muntwamu to bwà kufila dyumvwi-. . .) Yèyè mudifile. Kàdì ncyàkucyàmbakù to ànu cyòci ciikàle nàнку, bwalu mèmè ndi ànu mwà kucyènza; dìbà adi nêmmanyè nè neciikàlè cyà bushùwà. Mpindyewu.

**376. Mukàji-musèla, bàdì biitàbuuje Mukenji ewu, bàdì nè cyà kuya ku wesètè, ndekeelu wa byònsò kukùngwila kuntwaku anyì, ke cìndì nswa kwamba?**

**377. Nènku cìdì** (Mpindyewu, anjì indilà kakesè, eci cìdì. . . kutwàla. . . Ànu katancì kakesè cyanàànà. Kaa! To, kí nnàнку to, cìdì nè “R-e-v.” Mèmè kudyàmbidila nè. . . M’Bwàkabuulwibwà nshapità, kàdì cimwèka bu nè “Révérend Capps,” nènku mvwa—mvwa—mvwa ànu nè ndambù—ndambù wa cibwejàkàjì pa bwalu abu. Cidi. . . Bu nwènú mwà kumòna, ncyà bushùwà nè cidi cimwèka bu cyòci aci. Nwamònu anyì? Cìvwa “Révérend Capps” nè pashìishe kutùngunukacì apa. . . To, bìdì ànu bímpè.) **Bwàkabuulwibwà nshapità 12, ùdì wàkula bwà Mukàji-musèla anyì?**

<sup>11</sup> To! “Mpindyewu, Mukàji-musèla ùdì nè cyà kuya ndekeelu wa byònsò ku wesètè, ndekeelu wa byònsò anyì?” Kabyena nàнку to ku dyànyì dimanya; Mukàji-musèla ng’wa buloba bujimà, pa buloba bujimà. Mpindyewu, bantu bònsò bàdì bùmvwè aci ambààyi nè: “Amen!” [Disangisha dìdì dyàndamuna nè: “Amen!”—Muf.]

Nànsha wèwè penyì, paùdì ufwila, nànsha ciikàle cinyì, wèwè mufwile mu Killistò, Nzambì nèàkutwàlè pàmwè Nendè. Nànsha byòbì nè udi mwosha mubùtula, mudìibwe yònsò, mubùtùdìibwe, mwònsò mùdìbì mwà kwikala amu, Nzambì nèàkutwàlè nè Kilistò pààlwàYe apu. Kabyèna bikèngela bwà

wèwè kusangila ku wesètè anyi ní mpenyi pònsò to. Mwaba wònsò ùdi Mukalenge ùkulombola awu. . .

<sup>12</sup> Nànsha nàнку, wèwè muumvwe ànu bu nè udi muswè kuya ku wesètè, ngànji nciòòkèshè ànu menemene mpindyewu, kumpàlà kwà mèmè kuya. Mpindyewu, pa nàнку. . . (Bàdi munkaci mwà kukwàta mukenji ewu anyi? Bàdi bàkwàta anyi? Èyo.) Kanùlekedì bwà nnwàmbilè kwà kuya to. Nènku nwènù nudyùmvwa bu nè nudi baswè kupàtuka kuya ku wesètè, pàtukàayi nùye ku wesètè. Wèwè udyùmvwa bu nè udi muswè kuya ku esètè, ku nord, ku wesètè, ku sud, udi uya kùdi Mukalenge ùkulombola aku. Bantu bònsò bàdi bùmvwà aci bambè nè: “Amen!” [Disangisha didi dyàndamuna nè: “Amen!”—Muf.]

<sup>13</sup> Ncyèna nteeta kwambila muntu nànsha umwe kùdiye kàyi nè cyà kuya nànsha. Nènku nwènù bapàtùke bayè mu Tucson, mu Arizona, mùndì musòmbèle bwà katanci kípì mu cikondo eci. . . Mùmvwà munwàmbile mu dindà emu amu, Ndi ngùmvwà kwètù kùnsaamina mwoyi kàdi nciyi nè kwètù kwà kuya to. Mvwa njinga bwà ngìkalapu nè muntu kampàndà, mwaba kansanga ùndiku mwà kubiikila nè nkwètù bwà mèmè kuyakù. Bu dilòlò edi, bu mèmè mwikàle nè binunu dikùmi byà ndola nè mufwànyine kufila mwaba bwà. . . nè kuyifila mudilekèlèle bwà mwaba kampàndà wùndì mwà kubiikila nè: “Ewu ke mwaba wùndì muswè kubiikila nè nkwànyì,” ndi mufwànyine kuyifila mudilekèlèle. Ncyèna nè mwaba nànsha.

Mwanèètù Fleeman, ndi ànu. . . wàkammanya pàncìvwà nsongàalùmè; ndi—ndi—ndi mulalakanyi. Kùshaadi mulalakanyi nànsha; petà mwaba kampàndà wùdi munangè nè ùsòmbelèmu; ùshaalè mwindìle Mukalenge Yesù.

<sup>14</sup> Kàdi nwènù baswè kupàtuka kulwa ku wesètè ku Tucson, mu Arizona, mùndì musòmbèle amu, difika dilenga; ndi mufwànyine kwikala nè disànkà dyà kwikalakù neenù. Wèwè udi mwanèètù wa balùme, mwanèètù wa bakàji. Ndi mufwànyine kwenza cintu kanà cyònsò pa buloba bwà kukwàcisha. Nè—nè nwènù bònsò bàdi bapàtùke kuntwaku abu, ndi muteetè nè mwànyì mwònsò mùndì mukùmbànyine bwà kunùjingila difika dilenga, nè kunùleeja byònsò bìmvwàku mumanyè, nè kunwèndesha ku nseke yònsò, kwenza cyònsò cìndì pàànyì mwà kwenza aci. Nènku nudi misangu yònsò ànu baakidila bilenga.

<sup>15</sup> Kàdi pawìkalà mupàtuka mu ngiikàdilù eyi, udyàmbidila nè Mukàji—musèla anyi cintu kampàndà necyùmukile ku Tucson, mu Arizona, nè ànu mwinè amu, udi mutùpàkàne. Kùpàtuki bwà cyòci aci to, kùlu bwà aci to, bwalu aci ntùpàkànyì. Aci kí ncilelèlà to.

<sup>16</sup> Mpindyewu, Bwàkabuulwibwà nshapità wa 12. . . Kàdi cintu ànu cimwèpelè cidì Mukalenge ùmbuulwila anyi

ùngambila bu. . . Ndi mfùmina ku bikèènà-kumòna abi (nudi numòna anyi?), nè mbikolè bwà kucipangisha. Nwamònu anyi? Kàdi Ùdi ùmwèka bu ùdi wàkula naanyi kàbìdì bwà kwamba kàbìdì byàbùngi bwà bìdì bitàngila diya dyà ku wesètè.

<sup>17</sup> Mpindyewu, ànu múmvwà mwambè kumpàlà, ncyèna kuntwaku ànu bwà disànkà dyà kwikala kuntwaku to, Ndi kuntwaku bwalu ndi mulombòdiibwe bwà kwikalakù. Kàdi bwà kushààla kuntwaku, kucivwija dīkù dyànyì, ndi ngèèla meeji nè aci kī ncyòci to. To, ndi ngèèla meeji nè neciikalè ànu cikondo cīpi cyanààna too nè piikalà kiipàcìlā kàdi Nzambì muntùmīne kakumbàne. Ncyèna mwà kunwambila apa nè mbwà cinyi ndi nya to, kàdi ncyàkuya ànu bwà kuya to.

<sup>18</sup> Bàvwa bacikonkè mu lukonko kampàndà ditùkù adi nè: “Tudi bamanyè nè mbwà cinyi uvwa muyè dyàmbedi ku Arizona, civwa mbwà Banjèlò bàakamwèneka abu. Bwà cinyi wàkaalukila musangu mwibìdì?” Nudi nuvùluka lukonko alu anyi?

<sup>19</sup> Mbanganyi bàdiku bavùlùke pangààkaalukilā paanyimà pàà cyòci aci nè mvwa musòmbe mwaba awu kumpàlà kwà Docteur Lee Vayle (Ngèèla meeji nè yèyè ùdi mu nzùbu emu mwaba kampàndà) nè mukàjàànyì? Nènku mvwa ngàakula bwà Arizona nè bwà twètù kushààla basòmbe kaaba aka, è kulwakù cyanza ku cimano nè bukènkè è kufùndaci nè màleetà nè: “Alùkìlā ku Arizona.” Mbanganyi bàdi bavùlùke cyòci aci? Ke bwà cinyi ndi mwalùkile kuntwaku. Nciyi mumanyè nè mbwà cinyi ndi mwalùkile to, nè pangàafiki kwòkò aku, ke kubuulula Yè civwà cikèngelà bwà mèmè kwalukilakù. Nènku mèmè mucyàmbè, dībà adi Sàtaanà neaciimànyikè. Kàdi kī mmumanyè mwoyi wànyì to. Yèyè kèna Dīyì to, pa nànkù kī mmumanyè mwoyi wànyì to. Kàdi mèmè mucyàmbè, dībà adi yèyè ùdi ùcyùmva. Pa nànkù mpindyewu, vùlukàayi aci.

<sup>20</sup> Mpindyewu, pangàakambà ditùkù adi, mvwa mu mùshindù kampàndà mucyenzè. . . mu mùshindù kampàndà pàmwàpa udi mufwànyine kupeta didifwikakajila dibì; Mèmè nè: “Kànùlu ku Arizona to.” Nwamònu anyi? Ncivwa nè meeji à kwamba nè: “Kànùlu to!” Ncīmvwà nswa kwamba civwa nè: Pawikalà mulombòdiibwe bwà kulwa, tūngunuka nè enzà bwalu abu, wèwè mulombodiibwe bwà kuya ku Californie, ku Arizona, kwònsò kùdì usanganyiibwa aku. Kàdi wèwè muyekù, wamba nè: “Mwanèètù Branham, nkàadi nya kuntwaku, bwalu ndi ngiitabuuja nè wèwè neushaalèku nè neuyiishe Dīyì,” Ndi ngiitabuuja nè nudi mu ntùpàkànyì mwaba awu. Nwamònu anyi? Mwaba wùdì diyiisha dyànyì disanganyiibwa, mmunwemu mu tabernacle emu mene; ke mwaba ngwòwò ewu.

<sup>21</sup> Ncyèna nè disangisha nànsha dimwè mu Arizona to. Nènku mèmè ncitu mu Arizona to kàdi ànu ndambù wa mèbà cyanààna ku musangu. Ncyèna nè. . . Ndi nè masangisha à beena Kantu-

ku-byanza paanyimà pàà Noël, mu dyà kumpàlà dyà cidimu, mu Phoenix. Ke cyònsò cìndi naaci ncyòci aci; mèmè ngudi mulaye cyòci aci, kî ncintu cikwàbò nànsha cìmwè.

<sup>22</sup> Masangisha ànyì àlondà, bwà ku dyànyì dimanya, neyikalè apa mene mu Mùsèèsù wà 8 nè wà Penn mu Branham Tabernacle. Ndi nè byena-bwalu makùmi àsàtù anyì makùmi ànaayi bìndi mumanyè nè mbifwànyìne kwangata lumingu lujimà anyì mbingu yìbidì ku cikondo bwà kubijikija, bìndi naabi pa mwoyi wànyì bwà kuyiisha mwaba ewu mu Branham Tabernacle emu, ànu munwemu mu Jeffersonville emu, mu Indiana.

<sup>23</sup> Nèku mpindyewu, pawikalà cyà bushùwà ujinga kuya mwaba kampàndà bwà kushààla nè Dìyì, mwaba ùdi Mukenji wètù. . . Nè Mukenji wètù kî mmushilàngàne to, m'Mukenji wùmfwèwùmfwè wunùdi bumfwè matùkù ènù ónsò à mwoyi awu, cibì cintu kampàndà cikwàbò cisokolola kù Wówò. Mukenji ewu ngówù Mukenji wùmfwèwùmfwè wákayiiisha Luther, Mukenji wùmfwèwùmfwè wákayiiishà Wesley awu, Mukenji wùmfwèwùmfwè wákayiiishà beena Mpenta awu, ànu cintu kampàndà cisàkidilaKù. Cìdici, ndibuulula dyà Bitampì, cìvwà balongolodi abu bashiye (nwamònu anyì?), kî cìdì cìmanyishìibwe mu ditùkù edì cìvwà kaciyì cìmanyike mu cikondo aci. Mukenji wa beena Mpenta kawùvwa mwà kumanyika mu matùkù à Luther anyì à Wesley to; bìvwa bikèngela wìndilè too nè ku cikondo cyà beena Mpenta. Kàdi cikondo cyà beena Mpenta kî ncintu cikwàbò to ànu cikondo cyà beena Luther citàmbe kutùngunuka. Bìdi ànu mùdi dikola dyà matalà, anyì cintu kanà cyònsò eci, ke mùdibi bwà Èkèleeziyà.

<sup>24</sup> Bu nè mvwa muyiishè diloòòlò edì, mvwa nè cyà kuyiisha pa cyena-bwalu, cìdì cìfùnda mwaba ewu mu Bible emu nè: *“Mvinyò wàkatementunyiibwa mu Èjiiipitù kumubweja mu Palestina.”* Mbanganyi bàà kunùdi bàdiku bamanyè nè Nzambi ùkaavwa mwambè nè Izàlèlèlà ùvwa mvinyò Wèndè? Dìbà adì ndi ntàngija mèsù paanyimà kùdì Yesù mwikalè Mvinyò. Nè Èkèleeziyà patùdi twakulangana apa mmumentemunyiibwe pa buloba, kî mmutèeka mu buloba to, kàdi mmusòmbesha mu Kìlistò, ùdi nè cyà kukwàma mamuma. Nwamònu anyì? Nèku aci ke cìvwà nè cyà kwikala diyiisha dyànyì bwà dilòòlò edì bu byòbì bikèngela bwà mèmè kuyiisha. Kàdi mèmè kudyàmbidila nè bìbwa bitàmbidile bwìmpè bwà mèmè kwangata makonka aa, ke pa nàнку mèmè è kulekela aci. Nèncyangàtè pàngà apa pangìikalè mwalùkile.

<sup>25</sup> Bwàkabuulwibwà nshapità wa 12 kèna ùtàngila Mukàjì-musèla to. Bwàkabuulwibwà nshapità wa 12 (Ncyèna mumutàngile to kàdi ndi mumumanyè), mmukàjì udi mwimàne mu díbà mwikalè nè ngondo mwínshì mwà makàsà èndè awu. Ngondo ùvwa ùleeja mukenji; mukàjì awu ùvwa ùleeja Izàlèlèlà, èkèleeziyà; nè mitootò dikùmi nè yìbidì ayi pa mpàla pèndè yìvwa mbàpostòlò dikùmi nè bàbidì abu, bikondo dikùmi nè

bibidi byà èkèleeziyà, nè bikwàbò, bivwà bifùma ku dipita abi. Nwamònu anyi? Nè díbà divwa ku mutù kwèndè. Cínùdi numòna aci, ngondo mmundidìmbi wà díbà, mùvwà mikenji miikàle mundidìmbi wà bintu bìmpè bìcilwalwà. Nè mukàji awu ng'Izàlèlèlè, kí m'Mukàji-musèla to.

Mpindyewu ncyàkupìcisha díbà dyàbùngì menemene to, bwalu ndi nè cyà kuyijikija.

**378. Loomò 7.14-18: “Tudi bamanyè nè mikenji nyà nyumà, kàdi mèmè ndi wa musunya, musùmbisha ku mpèkaatù. Bwalu cìndi njinga kwenza—to: bwalu cìndi njinga kwenza, cìndi ncìyi mwà kujinga to; kàdi cìndi nkìna, ke cìndi ngèza. Díbà adi pangùikalà ngèza cìndi ncìyi muswè kwenza to, ndi (m-w-à-. . .) ku—kùdi mikenji, ngùitaba mikenji, nè mmìmpè. Mpindyewu díbà adi, kí m'mèmè udi ucyèza to, kàdi mmpèkaatù udi musòmbèle munda mwànyi.” Eci ncyèna mwà kucyùmvwà to.**

<sup>26</sup> Èè, mbafùnde Mufùndu; awu's m'Pòlò wàkula nè beena Loomò. Mpindyewu yèyè wàkamba nè. . . Ndekèlaayi ngenzè bu udi ucilengejakù bwà nùfike ku dicimòna. Yèyè nè: “Munda mwànyi emu mùdi bantu bàbìdi: umwe mmuswè bwà mèmè kwenza bìmpè; mukwàbò mmuswè bwà mèmè kwenza bibi. Nè musangu wònsò wùndi ntwàdija kwenza bìmpè, díbà adi bubì bùdi bùmpangisha.”

<sup>27</sup> Mbanganyi bàà kunùdi mu miyiiki yà bàbìdi mu mappingaja emu bàvwà batwilàngàne nè cintu cimwècimwè aci, kàdi mu dindà emu (nwamònu anyi?), cintu cimwècimwè aci? Mvwa mwakùlepù mu dindà emu, mu mùshindù wà mukèlebeja.

<sup>28</sup> Wèwè udi muntu wa pambèlu udi mukòntònònyìbwe kùdi byumvwilu bisambòmbò; wèwè udi muntu wa munda mukòntònònyìbwe kùdi cyumvwilu cimwèpelè cìdi diitabuuja. Nènku diitabuuja edi didi dibèngangana nè byumvwilu byònsò bisambòmbò byòbì nè byumvwilu bisambòmbò ebi kabyèna bipetangana nè diitabuuja to. Kàdi cimwè cìdi cibèngangane nè cikwàbò. Mpindyewu, pàdi ànu byumvwilu bisambòmbò ebi bipetangana nè diitabuuja, mbilenga be; kàdi pàdi byumvwilu bisambòmbò bibèngangana nè diitabuuja, díbà adi lekèlè byumvwilu bisambòmbò abi.

<sup>29</sup> Mpindyewu, cileejilu kaaba aka, Yesù wàkamba díyi kampàndà, mulayi kampàndà. Muntu wa munda awu ùdi wàmba nè aci ncilelèlè; muntu wa pambèlu ùdi ùlukakaja lungènyi nè kacýèna mwà kwikala cilelèlè kunùdi to, díbà adi ùbenga muntu wa pambèlu awu nè wítabà muntu wa munda. Mpindyewu, ncyòci cintu cimwècimwè cìdi Pòlò wàmba aci. Wàkasùmbishiibwa ku mikenji bwà mpèkaatù wa musunya. Mbyà mwomùmwe bwà yònsò wa kutùdi. Ke bwà cinyi tudi. . . tudi nè ntàtù yitùdi naayi eyi, yà kwikala basèlàngàne misangu yinaayi anyi yitaanu, nè bikampàndà, nè bikansanga, nè. . .

mpèkaatù yà mishindù yònsò, nè masandi, nè bikwàbò byònsò mu nsòmbelu yètù, mbwà bintu abi. Tudi bàà musunya, nè citùpà aci cìdi nè cyà kubùtuka; kàdi pashiishe, munda amu, twètù tudi muntu wa nyumà, musùukà munda, nè ciine aci ndiitabuuja mu Dìyì dyà Nzambi; dîbà adi tudi tutwàla mubidi wètù wà pambèlu ku dikòokela ku Dìyì ku diitabuuja, ku diitaba dyà cyàkambà Nzambi.

<sup>30</sup> Mmunyì mündi mwà kwangata mpoopu kàdi kuyìvwija lutete lwà blé? Kabyènakù mwà kwenzeka to bwà mèmè kucyènzà. Mùshindù wùmwèpelè wùdìci mwà kwikala mbwala munda mwà mpoopu awu amu mmufume ku mpoopu wa blé. . . mpoopu ku mùtòlokò wùdìbo bàbìikila nè “mwoyi wà blé.” Pashiishe udi ujiika mpoopu awu, nè neàkwamè lutete lwà blé (ncyà bushùwà. Nwamònu anyi?), bwalu kùvwa mwoyi wà blé mutèeka munda mwà mpoopu amu. Nè mwoyi wà mpoopu wùvwa mupàtula; kàdi ngiikàdìlù wa mpoopu wùdi ànu kacya wàlamata (nwamònu anyi?), nènku neciikalè nànu too nè piikalà mwoyi mupyamùpyà ewu mupàtùkile patòoke mu buloba nè cijuudìibwe kàbìdi. Pàdìwu wùpàtuka, dîbà adi kí m’mpoopu kàbìdi to, kàdi m’blé—kàdi m’blé. Kàdi pàcìdìbi pa buloba apa nè. . . mu. . . cipàtùke mu buloba. . . Kàdi mpoopu, ùdi ànu kacya wàlamata, kàdi ùdi nè ngiikàdìlù wa munda mwèndè amu wa blé.

<sup>31</sup> Nènku ntàntà yònsò úcìdi mu mwoyi ewu, neùshaalè kacya wàlamata nè mwikàle nè ngiikàdìlù wa musunya wìkala mwà kukutàcisha ntàntà yònsò uwikalè nè mwoyi; kàdi munda mwèbè, udi mulediibwe cyàkàbìdi. Nènku paùdi mubiishìibwe ku lufù, udi mu difwànanngana nè Kilistò nè mpèkaatù yònsò mmyumùke kùdì. Nwamònu anyi? Kì—kì cintu ncyòci aci.

<sup>32</sup> Ndikù mwà kwamba eci anyi? Bidi byùmvwika bu nè mbilelèlà. Mwena Inde. . . S’mbantu bàà dikèma menemene. Nènku mèmè. . . Kì mbàà dikèma to; mbantu bàà pa bwàbò kutùdì; kàdi bàdi bàmwèka ànu mùdì bantu bònsò munkaci mwàbò bòbò. Nènku wèwè mufikè ku dibàmanya, bàdi ànu bimpè. Bààkakonka Indien kampàndà ùmwè musangu pààkasùngidiibwàye. . .

<sup>33</sup> Ndi mvùluka umwe mu Phoenix, mu Arizona. Billy ùvwa ùya bwà kwabanya twartà twà disambila. Nènku yèyè ùvwa mwà kushàala ànu mwimàne mwaba awu nè kwabanya twartà twà disambila. Nè bantu bàvwà bakùmbàne bwà kubànda kuntu kwàka nè kwangata twartà twà disambila. . . Dîbà dìvwà bantu bàdi bì—bimpè bàvwà bàsaama mutù, bàsaama dìnù, anyi cintu kampàndà cibàtácisha ku kànà kààbò kàà nkàsà, biikàle nè—biikàle nè twartà twà disambila, Mwanèètù Ruddell. Nènku pàà—pààkenzàbo nànu, dîbà adi mu mulongo wà babèèdi, cintu cimwèpelè cìndi naaci, mmuntu kampàndà mwikàle nè mutù ùmusaama, muntu kampàndà uvwa nè cintu kampàndà cimutàcisha ku mwànankàsà, nè cintu kampàndà cyà mùshindù

awu. Nènku kùvwa bantu basòmbe mwab'awu bapùnga nè lufù biikàle nè kànsèrè nè bikwàbò bàvwà kabàyi bafikè mu mulongo wà babèèdi awu. Mémè nè: "Billy, pwekà kuntu kwàka ùkonke bantu abu cidi cibàtàcisha. Nènku piikalàbo kabàyi nè kànsèrè, anyi disaamà kampàndà dyà dikwàcisha bwòwà to, anyi cintu kampàndà cìikalà mwà kubàshipa, kubàpèèshi twartà twà disambila to. Bweja bantu mu mulongo wà disambila biikale mwà . . . badi pabwìpì bwà kufwà Mukalenge kàyì mubàkwàcìshe abu. Bakwàbò abu bǎnjì ànu kwindila. Bǎlwilè mu mulongo wa lùkàsàlùkàsà wà babèèdi anyi cintu kampàndà. Kàdi lekèlà bantu badi pabwìpì nè kufwà abu. . . ." Mémè nè: "Bàkonkè."

Yèyè nè: "Èè, wèwè's wǎmbi nè: 'Sopàkàjà ànu twartà atu nè ùbàpèèshètu.' Ke címvwà ngenza ncyôci aci."

Mémè nè: "Kàdi's nudi munkaci mwà kufikisha bantu abu ku diya lubilu kuntwaku kumpàlà kwàbò, nè badi bàpeta. . . Balèmà bakwàte nè byà luse abu nè bikwàbò kabèèna mwà kutùpeta to."

"Èyo, nencyènzè."

Ùdi ùpweka; kùvwa Indien kampàndà mununu (nè batu bantu bàà pabwàbò menemene), kàvwa mufwànyine kusòmbe mu nkwasà to. Badi bàmupèèsha nkwasà, kàdi yèyè ùdi ùsòmbe panshi mu ntentà. Ùvwa muvwàle cifulu; kàvwa muswè kucyùmusha to; ùvwa nè lusàlà lwasa paanyimà pààci apu, kacya ànu wàsomba mwaba awu.

Billy kuseemenayè kùdiye, è kupìcilayè mwaba awu, kwambayè nè: "Udi ukeba kartà kàà disambila anyi?"

"Hmm."

Yèyè nè: "Ncinyi cidi cikutàcisha, Sheefù?"

Yèyè nè: "Mémè nsaama!"

Yèyè nè: "Kàdi cidi cikutàcisha ncinyi?"

Yèyè nè: "Mémè nsaama!"

Yèyè nè: "Kàdi ndi muswè kumanya cidi cikutàcisha!"

Yèyè nè: "Mémè nsaama!"

<sup>34</sup> Ke cyònsò cìvwàye mwà kupàtula mu yèyè aci, yèyè nè: "Mbìmpè, nengààlukile paanyimà pàà katanci." Ke Billy kutungunukayè nè dikonga bantu. Indien mununu awu è kushààla kacya wàlèngameena twartà twà disambila atu mùvwàtu twènda tükèèpela ànu kükèèpela. Musangu wònsò wùvwàye ùjinga kutùpàtula mu cibòmbò cyèndè tùvwa tutàmbe kükèèpela ndambù. Pa nàнку paanyimà pàà katanci, Indien mununu awu kujuukayè kuulu, nè kwasa lwendu, è kutuutayè Billy cyanza paanyimà bwà kumuvùlwija nè ùvwa pèndè mu bwalu ebu. Yèyè kwamba—yèyè kwamba nè: "Sheefù, ncinyi cidi cikutàcisha?"

Yèyè nè: “Mémè nsaama!”

Yèyè nè: “Èè, Sheefù, bikèngela ùngambilè. Papa mmwambè nè ncifidi twartà etu kùdi bantu bàdi bafwányine . . .bàvwà ànu nè, bu mùdi munda cinyèngù, màsaamà à mitù, nè bikwàbò. “Tufile kùdi bantu bàdi bàsaama menemene.” Yèyè nè: “Udi usaama bìshi, Sheefù?”

Yèyè nè: “Mémè nsaama.” Kumusòmbeshayè cyàkàbìdi panshi kumpalà kwà yèyè. . .twartà twèndè tùvwà twàmbà kujika. Ndambù wa tusunsa. . .Yèyè kushààla kacya wàlèngamena twartà atu. Kwalukilayè è kumutuuta cyanza paanyimà cyàkàbìdi. Yèyè koolola cyanza cyèndè. Billy kumutèekayè kartà mu cyanza, wàmba nè: “Sheefù, ndà ùkafùndèpu nè: ‘Mémè nsaama.’”

<sup>35</sup> Wàkabwela mu mulongo wà babèèdi, nè mémè mvwa munkaci mwà kumusambidila, ke mémè nè: “Udi witabuuja anyi, Sheefù?”

Yèyè nè: “Ncyà bushùwà.”

Ke mémè nè: “Èè, udi witabuuja nè Nzambi neàkwondòpè anyi?”

Yèyè nè: “Ncyà bushùwà.”

Mémè nè “Udi mufwànyine kwikala mwànà wa balùme wa maalu mimpè anyi?”

Yèyè nè: “Ncyà bushùwà.”

Mémè kutwilangana nendè bu lumingu lujimà pashìishe nàнку awu. Mwanèètù Fred Sothmann ngèèla meeji nè ùvwapù. Cìvwa ndìbà òvwàbò. . .nè pàvwà disangisha dyà mu ntentà ditungunuka. Kùvwa nku Phoenix. Ke mémè kutwilangana nendè pashìishe ndambù mu lumingu amu; mémè kwamba nè: “Udi bìmpè anyi, Sheefù?”

Yèyè nè: “Ncyà bushùwà.” Mémè kulwa kujandula nè, mvwa ngààkula nè. . .Dìna dyà mpàndànjlà awu òvwà nganyì kuntwaku, muntu mununu awu wa mwedi mutòòke, kuntu kwàka ku baa Apaches? Ncyèna mwà kuvùluka dìna dyèndè to. Kaa, yèyè’s mmuntu mununu mwìmpè maalu wa dikèma. Mukàjèndè wàkondopiibwa ku kànsèrè, nudi bamanyè’s. Yèyè nè: “Mwanèètù Branham, s’ke cyònsò cidiye mwà kwamba.” Yèyè nè: “Mvwa mumulongèshe bwà kwamba nè: ‘Mémè nsaama.’ Ke cintu cìmwèpelè cìvwayè mwà kwamba nè: ‘Ncyà bushùwà.’” Pa nàнку aci’s—aci’s ki cìvwa bu cyònsò, nudi numòna’s. “Ncyà bushùwà. Mémè nsaama!”

<sup>36</sup> Muntu kampàndà mmungambile nè ùvwa nè, umwe, musangu kampàndà, mukùdimùne mucìma, kupetayè Nyumà Mwìmpè, nè kumwambilayè nè: “Udi wenda uya kumpalà bìshi?”

Ke yèyè nè: “Bìmpè be nè bibi be.”

Yèyè nè: “Èè, mmunyi mùdì uswa kwamba nè bibi be nè bîmpè be?”

Yèyè nè: “Èè, kacya ànu ngâpeta Nyumà Mwîmpè,” yèyè nè: “kùvwa mbwa yibìdì munda mwànyì, nè umwe wa ku yôyi mbwa mufike nè umwe wa ku yôyi m’mbwa mutòòke.” Ke yèyè nè: “Yidi yikòkangana díbà dyònsò.” Wamba nè: “Yidi yifuunyanangana nè yilwangana ewu nè mukwèndè.” Ke yèyè nè: “Mbwa mutòòke mmuswè bwà mèmè kwenza maalu mîmpè; mbwa mufike mmuswè bwà mèmè kwenza maalu mabi.”

Yèyè nè: “Èè, Sheefù, nganyì wa ku yôyi wudi wucimuna mvità?”

<sup>37</sup> Yèyè nè: “Aci ncilààle ku wudi Sheefù ùtamba kudiisha awu.” Pa nàнку ndi ngèèla meeji nè aci’s ke dyandamuna dímpè kaaba aka. Nwamònu anyi? Aci ncilààle ànu ku mvità yidi yilwànganyibwa munda mwà mubidi wèbè; ncilààle ku ewu wúdi wudiisha, ku ngiikàdìlù ùdì udìisha, ngiikàdìlù wa mubidi udi unanga bintu byà pa buloba, anyi ngiikàdìlù wa nyumà udi unanga bintu byà Nzambi. Aci kè cidì cicyèza.

**379. Mwànà wa balùme yònsò wa Nzambi udi mwà kwikala mwediibwe maanyì mu mùshindù wà nè yèyè ùdi mwà kwenza bishimà, bimanyinu, maalu à kukèma, anyi ebi bìdì ànu. . . ebi nku bulombodi bwà Nyumà Mwîmpè anyi?**

<sup>38</sup> Èyowà, cidì ku bulombodi bwà Nyumà Mwîmpè. Pawikalà mwànà wa balùme wa Nzambi, anyi mwànà wa bakàji wa Nzambi, cyònsò cyúdi aci, paúdi upeta Nyumà Mwîmpè, díbà adi Nyumà Mwîmpè ùdi ùkulombola bwà kwenza maalu.

<sup>39</sup> Ncyènà nè díbà to. Mvwa ànu njinga nè mvwa mwà kunùlondelaku tumaalu tukesè. Musangu wònsò wúndì ntùmaku meeji, ndi ànu nè cyà kucìpìcisha. Kàdi ndi ngèèla meeji nè ebu nembwámbe ànu bwà katanci kakesè cyanààna.

<sup>40</sup> Kùvwa nku Meridian, mu Mississippi. Bààbúngì bàà kunùdi nwènu ba-Unitaires, Mwanèètù Bigby ùvwa ùlombola. . . ùvwa ùtùla mfrangà bwà masangisha àànyì, mmwanèètù wa ba-Unitaires. Nènku dilòòlò kampàndà mu disangisha kampàndà, Billy Paul ùvwa muyè mu cipalu cyà manàyi nè ùvwa mwabànye twartà twà disambila. Kaa, mvùla wùvwa munkaci mwà kwicikila. Nè bantu bàvwa biimàne pambèlu nè makumbi nè bikwàbò. Ke Billy kwabanyayè twartà twà disambila, nènku kùvwa. . . Ke pashìshe kulwayè bwà kungangata. Nènku pàcìvwàku. . . pàcìvwàye mulwè bwà kungangata apu, kùvwa inábànzá mutekète uvwa musòmbèle lwà kumpàlà aku, nènku kùvwa inábànzá mukwàbò uvwa utàmbakana nè mwànà mukesè wa mu dibòkò, ùteeta bwà kumulama mupùwe. Nènku yèyè inábànzá mutekète ewu uvwa musòmbè nè nkanzu wa ndàndà pambidi, anyi nè cìvwa cinyi, ùvwa pèndè maamù. Ke mukàji awu kumònayè inábànzá awu, nè Nyumà Mwîmpè kwakula

nè mukàjì awu, cintu kampàndà pa mwoyi wèndè nè: “Ndà ukasambidila mwànà wa mu dibòkò wàwa.”

41 “Èè,” mwàkambàye, “musangu wàlondà wàpitàye, nényè kamusambidila.” Kàdi pàkapitàye kàbidi, inàbànzà awu ùwà mukwàte kartà kàà disambila mu cyanza. “Kaa,” mwàkambàye, “mémè—mémè ncivwa mwà kusambidila mwànà wàwa to.” Yéyè nè: “Mwanèètù Branham’s neàsambidilè mwànà wa mu dibòkò awu dilòòlò edi. Nènkù mémè ndi nganyi bwà mémè kusambidila mwànà awu pìikalàbi nè Mwanèètù Branham neàmusambidilè?” Mpindyewu, aci cívwa cyà kaneemu kààbùngi, nè aci cívwa cilenga, kàdi aci kacýena mwà kwikala misangu yònsò ànu diswa dyà Nzambì to. Míngà misangu mbishìllàngane.

Nyumà Mwímpè wàkatùngunuka ànu nè kumwambila nè: “Ndààku ùkasambidile mwànà wàwa.”

Ndekeelu wa byònsò kudyàmbidilayè nè: “Mukaji wàwa neàmfwishè bundu. Bu mùdìbi nè ùwà nè kartà kàà disambila aku, kì mmufwànyìne kuswa bwà mémè kusambidila mwànà wa mu dibòkò awu to. Mmulwè nè mwànà wa mu dibòkò awu kaaba aka, kì mbwà mémè kumusambidila to, kàdi mbwà Mwanèètù Branham àmusambidilè.”

Ke Nyumà Mwímpè kutùngunuka nè kwamba nè: “Ndà ùkasambidilè mwànà wa mu dibòkò wàwa.”

Ndekeelu wa byònsò yéyè nè: “Èè, bwà kwikishisha mwoyi wànyì wà munda mémè nèngàmbè ànu . . . Nèmmushìlè nkwasà wanyì ewu.” Kì yéyè nè: “Munanga wanyì (maamù mutekète kampàndà ùdi munkaci mwà kwakula nè mukwàbò), udikù mwà—ùdi muswè . . . ? Udi nè mwànà wa mu dibòkò awu,” yéyè nè: “udiku mwà kulwa, kusòmbela pànshì apa, kwangata nkwasà wanyì ewu anyì?”

Yéyè nè: “Kaa, Munanga wanyì, ncyèna muswè kwangata kaaba kèèbè to.” Yéyè nè: “Ndi nteeta bwà kushààla mulamè mwànà wa mu dibòkò ewu mupùwe.”

Yéyè nè: “Kàdi udi umweka mucyòke ànu menemene nè muzengèle.”

Yéyè nè: “Ndi muzengèle.”

Yéyè nè: “Èè, sòmbelà pànshì apa wàngatè nkwasà wanyì ewu.” Ke yéyè nè: “Ndi mmòna nè udi nè kartà kàà disambila. Pàmwàpa wèwè udi . . . Mwanèètù Branham neàsambidilè mwanèèbè wa mu dibòkò ewu anyì?”

Yéyè nè: “Tudi tutèkemena nè nombà ewu nèbìikidiibwe.”

Ke yéyè nè: “Èè, nè mémè pàànyì’s.” Yéyè nè: “Mwanèètù wa bakàjì, udi mwena Kilistò anyì?”

Yéyè nè: “Kaa, èyowà’s!”

Yéyè nè: “Mémè pàànyì’s ndi mwena Kilistò.” Ke yéyè nè: “Kacya ànu ngààsòmba mwaba ewu, Nyumà wa Mukalenge

ùvwa munkaci mwà kungambila nè: ‘Sambidilà mwànà wa mu dibòkò wàwa.’ Udikù mwà kumpèsha dyanyisha anyi? Ndi mumanyè nè Mwanèètù Branham neàsambidilè mwànà wa mu dibòkò awu yéyè mubiikidiibwe. Nènku wèwè tũngunukà ànu nè kulama kartà kèèbè aku, yéyè neàkàpetè.” Yéyè nè: “Kàdi bu mèmè mwà kutentekela mwànà wa mu dibòkò ewu byanza, nè kulàmbula ànu disambila dikesè bwà mèmè kudyùmvwakù bĩmpè, nè kupàtuka mu cidi munkaci mwà kumbiikila eci, mbifwànyineku—mbifwànyineku kukutàcisha anyi?”

<sup>42</sup> Yéyè nè: “Mòna’s, nànsha kakesè, Munanga wanyì. Sambidilàku mwànà wa mu dibòkò èwu.” Nènku kàvwa nkànà kakesè kàà mu dibòkò kiikàle nè disaamà dyà dikèèpela dyà oxygène, nènku inàbànza mutekète awu—awu kukàsambidilayè. È kupèèshayè inàbànza awu nkwasà, è kubàndayè ku cisàsà ciisàtù è kushààla mwimàne kuulu. Mwanèètù kampàndà mwena Kilistò, muntu wa dipòkù menemene mukùmbàne bwà kujuuka kuulu bwà kupèèsha inàbànza awu nkwasà, nànkù è kusòmbayè.

<sup>43</sup> Paanyimà pàà bu tusunsa tutwè ku makùmi àsàtù nànkù awu, mèmè kubwela mu disangisha amu, kwakula ndambù wa tusunsa, kubiikila twartà twà disambila; nènku yéyè mukàji ewu ùvwa mwisàtù ànyì mwinàyi mu mulongo nè mwànà wa mu dibòkò awu. Ke yéyè musòmbè kuulu aku, è kwambayè nè: “Kaa, twasàkidila, Mukalenge. Mpindyewu, ndi mùmvwè luse be bwà maamù mutekète awu, ngèèla meeji nè mwànà wa mu dibòkò awu neàsangalè mpindyewu, bwalu Mwanèètù Branham . . . Ànu pa mwisàtù anyì mwinàyi, yéyè neàkafikè ku yéyè awu.” Yéyè nè: “Twasàkidila, Mukalenge,” maamù mutekète musòmbè kuulu aku, nè njiyà yà mwànà wa mu dibòkò awu. Èyo.

<sup>44</sup> Pashiishe ndi mwenzè ànu nseemena, mbanga kusambidila mwànà awu, pàakaseemenà inàbànza awu, e kwamba, mèmè kumutangila è kwamba nè: “Mpindyewu, mwanèèbè wa mu dibòkò mmwànà wa disaamà dyà dikèèpela dyà oxygène. Udi mulwè nendè kaaba aka bwà kumusambidila. Nènku mpindyewu, dìnà dyèbè m’Màndàmù *Kampàndà*, nè udi mufùmìne mu mwaba *kampàndà*; kàdi mwànà awu ùkaadi mumanè kwondopiibwa. Kùvwa mukàji kampàndà uvwa nè bujitu pa mwoyi wèndè dìnà dyèndè Màndàmù *Kampàndà*, udi musòmbè kaaba aka mu cisàsà (wa kumpàlà ku ndekeelu kwà mulongo mwinàyi mu cisàsà ciisàtù mwàmwa), mmusambile disambila dyà diitabuuja bwà mwànà wa mu dibòkò ewu; nè mwinè mwànà wa mu dibòkò ewu mmumanè kwondopiibwa.” Wàkamba ànu kukùluka mu nkwasà wèndè. Nwamònu anyi?

<sup>45</sup> Mpindyewu, ambàbi tũng bu nè kàvwa mwenzè nànkù? Nudi bumvwè cìndi muswè kwamba aci anyi? Mpindyewu, mukàji awu ùvwa mufwànyine kumvwila mwinè mwànà wa mu dibòkò awu luse lwàbũngi, maamù bwà mwànà wa mu dibòkò

kuntamba mémè bwà mwânà wa mu dibòko awu. Nwamònu anyi? Nè maamù mwikàle. . . Nwamònu anyi?

<sup>46</sup> “Tudikù bônso mwà kwenza bishimà anyi?” Èyowà. Paùdi mulombòdiiibwe kùdi Nyumà Mwímpè bwà kwenza bishimà, ndàaku ùkabyènzè, bwalu n’Nyumà Mwímpè udi ulombola awu.

<sup>47</sup> Mpindyewu, bu mukàjì awu kàyì mwà kwikala mutùmikile cìvwà Nzambi mumwambile aci, pàmwàpa kùvwa mwà kwikala ditàndisha dyà mu Nyumà kùdiye (nudi numòna anyi?), nè yèyè’s ùvwa mufwànyine kwikala mushikùkile Nzambi. Misangu yònsò, wèwè mwikàle mwena Kilstò nè cintu kampàndà ciikàle cikwenzeja bwà kwenza cintu kampàndà, ndà ùkacyènzè. Ndàaku ùkacyènzè; kùcyèdi mpatà to; ndà ùkacyènzè.

“Ndi muswè kwela lukonko. Cidi. . .?” Lukwàbò lùmwe lwà ku yòyì ndwòlu elu, anyi ndi mwàngàcile ku luseke lubi. . . Èyo, ndi. . . Alu ndùmwe lwà mu dindà emu. “Bàkàjì bàvwàla pijàma, mbilàmbà byà bantu balùme anyi?” Lùdi nè cyà kwikala lusambàkàjiiibwe mu mikwàbò eyi.

“Mwanèètù Branham, Nzambi nguvwa wenza cintu aci. . . ùvwa n’Nzambi. . . mvwa ngèza cintu cìvwà cyenzeke pàvwà mukàbà wà méyì awu. . .?” Kaa, èyowà’s, tuvwa bamòne aci mu dindà emu. Ndi nè cyà kwikala nè ndambù wa yà ku yòyì ayi misambakaja. Mvwa nè cyà kwikala muyipàndè, kàdi ndi nkina bwà kwenza nànkù.

**380. Mwanèètù Branham, mbanganyi bǔjà buloba pambèlù pàà Cimenga cyà mu Dyulu?**

**381. Umvwijàku bwà mwanjèlò wa muntu udi ushààla nendè kuumukila ku dilediibwa too nè ku lufù awu.** Lukonko lwímpè be.

<sup>48</sup> Ntu ngumvwa bibi bwà kupìta yòyì eyi; nnkonko mímpè. Nè ndi muswè bwà bàna bàanyi—bàanyi bàmanyè bintu ebi. Nwamònu anyi? “Mpindyewu, mbanganyi bǔjà buloba pambèlù pàà Cimenga?” Pambèlu, mbapikula bǔjà buloba, pambèlù pàà Cimenga, kàdi bóbò kabààkwikala Mukàjì-musèla musungula nè mubiikiidiibwe awu to. Mukàjì-musèla neikalè musòmbèle munda mwà Bukalenge pàmwè nè Mfùmù. Pambèlu nepiikalè bamfùmù bàà buloba bàdi bàkwàta mudimu mukolè nè bàtwàle ntàtù yàbò, bàtwàla yàbò. . . kì n’lutàtù to, kàdi bàtwàla mamuma àbò mu Cimenga. Nè biibi kabyàkwikala bikàngiibwe butùkù to.

<sup>49</sup> Mpindyewu, pa. . . Mpindyewu, Bukènkè bùdi pa lusongo lwà mukùna ebu kabwàkukenkesha buloba bujimà to, Nebùkenkeshè ànu Cimenga. Kàdi Bùdi mwà kumwèka mu ntàntà wa binunu byà kilòmèètà pàngà apa; kàdi kaBwàkukenkesha buloba to, bwalu Bible mmwambè, mu Buloba Bupyabùpyà, bwà nè kuumukila ku Nsabatù umwe too nè ku mikwàbò—kuumukila ku ngondo mupyamùpyà kuya ku

mukwàbò (nudi numòna anyi?) bantu nebàbandè kumpàlà kwà Mukalenge ku Siònà, bàbànda ku Cimenga bwà kukuukwila.

<sup>50</sup> Nènku mpindyewu, nebiikalè pambèlu pàà Cimenga, kí m’Mukàjì-musèla to, kàdi bantu bààbìika ku dibìikà diibìdi nebiikalè badimi bàà buloba, ànu mùvwà Adàmà amu, nè bikwàbò, nè bàdì bakùbì bàà budimi. Kàdi Mfùmù nè Mukalenge-mukàjì nebàshaale mu Cimenga.

<sup>51</sup> “Umvwijàku bwà mwanjèlò wa muntu yònsò udi ushàala nendè kuumukila ku dilediibwa awu.” Mpindyewu, bu nwènù mwà kumòna...Mpindyewu, eci ncyà ndòndò menemene. Mpindyewu, kacya ncutukù...Mémè ndi anù mulwambùle ànu cyanààna. Mpindyewu, kùdì...Citùpà cyàlù ncutuuta ku màshinyi nè cikwàbò ncfùnda nè crayon—anyi bikè.

<sup>52</sup> Mpindyewu, kùdi Mwanjèlò, kàdi Mwanjèlò wa Mukalenge ewu udi wása citùdilù ku kálà kwà bàdì bàbàciina... bàdì bàMuciina. Nwamònu anyi? Mpindyewu, kí mbalayè nè bangènzàmpèkààtù bàdì nè Banjèlò to, ànu bapikula nkààyaabò ke bàdì nè Banjèlò. Nuvwakù bamanyè nàнку anyi? Banjèlò bàà Mukalenge mbèèlè citùdilù cinyùngùlùkile aba bàdì bàMuciina.

<sup>53</sup> Mpindyewu, Banjèlò mbaamìsànjeelà. Ndi muswè bwà nwènù kumòna nè mbipwàngàne ànu menemene, nènku necinùjaadikilè didyànjlila-kulongolola. Nwamònu anyi?

<sup>54</sup> Mpindyewu, pàdì mwànà mukesè wa mu dibòko ùfwimbiibwa mwínshì mwà mwoyi wà maamù...Nè nwènù bânà bakesè bàdì bùmwa maalù aa, nwamònu’s, Mukalenge ngudi munùfile kùdi maamù. Nè yèyè wàkawkambula mwínshì mwoyi wèndè amu, bwalu wèwè udi pabwìpì nè mwoyi wèndè. Ke pashìishe, dīngà ditùkù Mukalenge kutùluka nè kuumusha ku mwoyi wà maamù aku, kule nè mwoyi wèndè, kàdi newikalè misangu yònsò ànu mu mwoyi wèndè.

<sup>55</sup> Mpindyewu, pàdì mubidi mukesè ewu munkaci mwà kufwimbiibwa apu, mubidi mukesè wà mu bufùki mwikàle ùfwimbiibwa munda mwà maamù, kùdi mubidi wà nyumà wà pa buloba mudìlongòlòle bwà kwakidila mubidi wà mu bufùki ewu pàdiwu ànu nè wàlediibù. Mpindyewu, mwànà mmulediibwe nè misunya nè mwoyi, mwoyi wà munda wùtuuta, kàdi kawùyì nè mupùyà wà mwoyi munda mwàwù to. Mmisunya yidi munkaci mwà kuditunya...Nwamònu anyi? Dìbà adi, nwamònu’s, bu nè kùvwa cintu kampàndà cishìilàngàne nè cyòci aci, bu nè kakùvwa nyumà kampàndà uvwa nè cyà kubwelamù pashìishe to, dìbà adi mupùyà wètù wùdi mwà kutùshiya, nè tudì bafwànyìne kubènga kweyela kàbìdì cìkòlà biikàle ànu nè mwoyi. Kàdi pàdì mubidi ewu kawùyì wàkidila lupeepèlè lwà kùdì...anyi mwèyelu (dikòka nè dipàtula dyà lupeepèlè dyà bisùlusulu byètù), dìbà adi tudì bafwè.

56 Mpindyewu, kàdi pàdi maamù. . .Mwânà mukesè wa mu dibòkò awu kumatayè pa buloba ùmukila ku mwoyi wà maamù. “Ùmata,” nudi numvwa cìndì munkacì mwà kwamba, mùshindù wùndì. . .cìndì ngàmbila cyòcì eci mùshindù ewu. Pàdi mwânà mukesè, wa mu dibòkò awu ùmata, cìdì cyènzekà ncinyi? Pàdiyi ànu nè wàpàtuki, yèyè kàyì mubange kudila mwadi to, ngàngàbukà, mukàji muleleshi, anyi ní ncinyi cyònsò, neàmupatè dipi [Mwanèètù Branham ùdi ùtuutakaja byanza—Muf.], ùmoolola. Udi nè cyà kunyùkushiibwa, kàdi ncinyi cìdì cyènzeka?

57 Mònaayi nè, maamù, udi mwà kwikala nè lwonji lwà menemene nè cikisu, kàdi ànu kumpàlà menemene kwà mwânà awu kulediibwayè, kùdi kalolo kampàndà kàdi kàbwela. Nukààdikù bamòne maamù kampàndà kumpàlà kwa kulelayè anyi? Kùdi cintu kampàndà cyà kalolo pa bìdì bimutàngila; yèyè ùtu misangu yònsò ànu wàngata kalolo aku. Mbwalu bwà nè mwanjèlò mukesè awu, nyumà mukesè awu, mùsànjeelà mukesè bwà kaatabernacle kakesè aka ùkaadi pabwìpì nè kupatuka kubwela pa buloba. Nè pashiishe, pàdi mwanjèlò mukesè ewu ùbwela mu mubidi (awu’s m’wanjèlò mukesè wa pa buloba, nyumà kampàndà udi mutèèkiibwe kùdi Nzambi bwà kwangata mubidi ewu), dìbà adi bìdì bikèngela bwà mwânà wa mu dibòkò awu ikalè nè disungula. Ùdi wàngata dipàngadika dyèndè. Dìbà adi pàdi cyòcì eci cyènzeka, dìbà adi, nudi numòna’s, Mwanjèlò wa Mukalenge ùdi ùbwela muntwemu mpindyewu, wùdi mubidi wa nyumà, wà Cyendèlèlè awu.

58 Eci nnyumà udi ufwa mu mubidi wùdi wùfwa; kàdi mpindyewu, kwèna mwà kwikala mu mibidi yibidì musangu wùmwe to, kàdi kùdi mwà kwikala ngiikàdìlù yibidì munda mwèbè amu musangu wùmwe. Mpindyewu, ngiikàdìlù wa Nyumà wa Mukalenge. . .Paùdì mulediibwe cyàkàbidì, kwèna mulediibwe kùdi mubidi, muvwa mwânà awu amu to; kàdi cìdì cyènzèke, dilediibwa dyà nyumà ndilwè kùdì. Nènku pàdi dilediibwa dyà mu nyumà edi munkacì mwà kukola mu mwoyi wèbè apa, wà Nzambi, kùdi mubidi wa mu bufùki anyi mubidi wà mu dyulu mwikàle wènda ùkola bwà kwakidila nyumà awu. Nènku pàdi mwoyi wùmuka mu mubidi ewu, wùdi wùya ku mubidi wàwa. Ànu mùdì mubidi wùleejiibwa kùdi buloba amu, nyumà ùdi ùbwelamù, nènku pàdi nyumà ùpàtuka mu mubidi, kùdi mubidi wùdi mwindile. “Bwalu tudi bamanyè nè paanyimà pàà ntentà wa pa buloba ewu mumanè kuingutudiibwa, tukàadi nè mukwàbò mwindile.” Nwamònu anyi? Ke cyòcì aci, mubidi wa nyumà wa bantu.

### **Mwanèètù Branham . . .**

Mpindyewu, eyi yidi nè cyà kwikala. . .Kùdi kasùmbù kàyì kaaba aka, bìdì bimwèka bu nè yòyì mikesè ndikùmi anyi dikùmi nè yitaanu. Yònsò mmifùnda pa dibèji, pa dibèji dyà mùshindù wà mwomùmwe adi, mituuta ku cyamù, nè bikwàbo. Nènteete

bwà kufika ku yôyi nè lùkàsà lwónsò. Tudi mwà kupàtuka mu . . . nè lùkàsà lwónsò.

**382. Mwanèètù wa balùme munanga, Yesù kî mmufwànyìnekù kwitaba dikuukwila mu Bwàkabuulwibwà kùdì Yone pààkadishindàye bwà . . . Bwà cinyì Yesù kààkaswà kwakidila dikuukwila mu Bwàkabalwibwà kùdì Yone pàvwàYe—pàvwàYe mwitàbe bwà bàMukuukwila kumpàlà? Bwà cinyì Yesù kàvwa muswè kwakidila dikuukwila pàvwà Yone muswè kuMukuukwila?**

<sup>59</sup> Mwanèètù wa balùme anyì wa bakàjì munanga, nànsha yèyè mwikàle nganyì, kàvwa n'Yesù uvwa kàyì muswè kwakidila dikuukwila to. Mu Bwàkabuulwibwà 22.8, neùbalè nè yèyè ùvwa mmupròfetà, mwanjèlò, uvwa kàyì muswè kwakidila dikuukwila awu. Pààkapònà Yone bwà kukuukwila mwanjèlò uvwa mumuleeje maalu aa, wàkamba nè: “Dìlamè bwà kùcyenji to, bwalu mèmè ndi wa ku bânà bèènù. Ndi umwe wa ku bapròfetà.” Nwamònu's, nwamònu anyì? “Mèmè ndi wa ku bânà bèènù, musadidi neebè, umwe wa ku bapròfetà; kuukwilà Nzambi.” Kàvwa Yesù wàkadibènga to, ùvwa mmupròfetà uvwa kàyì muswè kudiitaba awu.

**383. Mwanèètù Branham munanga, ndishìilangana kaayi didì pankaci pàà Yesù ùpùùdijila pa bayidi nè wàmba nè: “Angàtaayi Nyumà Mwìmpè,” nè pàvwàbo—pààkakèngelàbi bwà kuyabò ku cibambalu cyà kuulu bwà kushàalabò bindìle?**

<sup>60</sup> Cìvwa mmulayi wàkabènzèlàyè, ùbàpùùdjila mulayi Wèndè, wàmba nè: “Akidilaayi Nyumà Mwìmpè.” Cìvwa mmulayi. Bààkaya ku cibambalu cyà kuulu bwà kwindilabò bwà mulayi kuulawù.

<sup>61</sup> Ncintu cìmwècìmwè nè patùdì tunùtentekela byanza bwà nwènù kwondopiibwa, dìbà adi nudi nutùngunuka nè mudimu wènù biindìle bwà mulayi kuwulawù.

**384. Mwanèètù Branham, Yesù wàkashintulula cibwikilu cyà mubidi misangu mivulè pààkamwènekèlàyè bayiidi paanyimà pàà dibìshìibwa Dyèndè dyà ku lufù anyì?**

<sup>62</sup> “Yèyè wàkashintulula cibwikilu Cyèndè cyà mubidi aci anyì?” Ncyèna—ncyèna mufwànyine kumanya to, bwalu ndi ngèèla meeji cìvwàci, Yèyè kààkashintulula cibwikilu Cyèndè cyà kwìsù kuntwaku to. Cintu cyàkènzàYè cìdì, Wàkapangisha bwà kuMumònabò anyì kuMumanyabò.

<sup>63</sup> Bu aba bààkafùminà ku Emmaùsè abo, bààkenda Nèndè ditùku dijimà kàdì bàvwa bapangìshìibwe bwà kuMumònabò; Kàbidì bààkamòna muntu kampàndà ku mwelelu wà màyi musangu kampàndà munkaci mwà kulòba mwaba wùvwàbo balòbe; Yèyè nè: “Bànà wetù, nudikù nè cintu kampàndà anyì?”

Ke bôbò nè: “Katwèna bakwàte cintu nànsha, tudi bakwàte mudimu mukolè butùkù bujimà.”

Yèyè nè: “Elààyi luseke lukwàbò lwàlwa.” Ke kubàkulayè mushiki mujimà wà mishipa, nè kumanyabò díbà adi nè ùvwa m’Mukalenge. Ndi ngèèla meeji nè kacivwa cibwikilu Cyèndè cyà kwìsù cishintùlùke to, ndi ngèèla ànu meeji nè cívwa ànu mèsù àbò àvwa mapangìshìibwe bwà kuMumòna.

**385. Mwanèètù Branham, ndishìilangana kaayi, ní— ní didikù, pankaci pàà Mwanjèlò wa Mukalenge nè Mukalenge, Yèyè mwìnè?**

<sup>64</sup> Mwanjèlò wa Mukalenge mmùsànjeela mutùma kùdì Mukalenge, nè Mukalenge Yèyè mwine ke Mupèrsonà awu, kàyì mupèrsonà wa mwanjèlò awu to, mwanjèlò wa kùdì Mukalenge awu. Lekèlaayi nnùleejè. Mu ngaakwilù wa pa buloba ewu ùdì mmwanjèlò mufùme kùdì Mukalenge. Mu ngaakwilù wa pa buloba ewu ùdì mmwanjèlò mufùme kùdì Mukalenge. Mu ngaakwilù wa pa buloba ewu ùdì mmwanjèlò mufùme kùdì Mukalenge. Tudi tumanya díbà adi nè mbanjèlò bàdì bafùme kùdì Mukalenge munyi? Pàdìbo bàlwa nè Dìyì dyà Mukalenge. Kàdì pàdìbo bàteeta kuDìnyangakaja, díbà adi kí ndyà kùdì Mukalenge to, nwamònu’s, nwamònu’s, bàteeta kuDivwija cintu kampàndà cidìDi kadiyi dyàmba to. Bàmba ànu cintu cyònsò cyanààna. . .

<sup>65</sup> Pashìishe kùdì Mwanjèlò mutàmbe-mfùkilu utu upweka ùfùmina kùdì Mukalenge, Mùsànjeelà bu mùdì Ngabùdyèlà, nè— nè Mikàelè, Woodworm, nè bikwàbò, mènà abo.

**386. Mwanèètù Branham, ncinyi cidì cimwèka bu cibi mu ditùkù ditùdì nè mwoyi edi, bwà kwikala mwena kwitabuujà nè kulonda Mukenji nè mùsànjeelà wa leelù ewu, paùdì kùyì mwà kusambila bu udi mufwànyine kusambila mùdì muswè kusambila? Alu’s ndukonko lwimpè.**

<sup>66</sup> Ndi ngiitabuujà mwanèètù wa balùme, mwanèètù wa bakàji, yònsò udi mwelè lukonko elu nè, mbwà ngiikàdìlù yà cikondo eci. Ditàbuluja ndijikè. Ditàbuluja ndinènge bidimu bitwè ku dikùmi nè bitaanu, nè kacya kaditukù dinènge kale wàwa disambùke pa bidimu bitwè ku bisàtù nànsha. Ndi ngèèla meeji nè mmupetè ditàbuluja dyèndè dyà ndekeelu. Nènku ndi ngèèla meeji nè ke bwà cinyi kwènà mwà kusambila nè kudyùmvwa mu Nyumà bu munùvwà nudyùmvwa kale amu to. Mbwalu tupyà twà ditàbuluja ntumanè kujìma.

**387. Mwanèètù Branham, swàkù ùmvwijè mùdì muntu ùmanya ní ùdì wèla meeji èndè sungasunga, anyi ní ndyabùlù udi utèeka èndè meeji mu mutù wèndè bwà kumufikisha ku dyela meeji mabì, nangàngà, wèwè mumanyè nè kwèna muswè kwela meeji awu to.**

<sup>67</sup> Dìbà adi, cyôci cibèngangana nè Dìyì, awu's ke meeji à dyabùlù. Cyôci ciikàlè cipetangana nè Dìyì, m'meeji à Nzambi. Cyôci ciikàlè meeji mabi, n'dyabùlù. Cyôci ciikàlè meeji mîmpè à Dìyì nè à Nzambi, cidi mmeeji à Nzambi.

**388. Bu bwalu abu mwà kwikala nè ndyabùlù udi munkaci mwà kutèèka meeji mu mutù wèbè pa cintu kampàndà, mmunyi mutùdi mwà kuàcimuna anyi kutàpuluka naawù?**

<sup>68</sup> Angàtà wèwè ànu cidi cibèngangana naawù aci. Dyabùlù yèyè mukwelèshe meeji nè—nè—nè wèwè udi . . . Wèwè mumanyè nè udi mwena Kilistò, kàdi yèyè uteeta bwà kukufikisha ku dyela meeji nè kwèna mwena Kilistò to, angàtà wèwè ànu cidi cibèngangana naaci, wamba nè: “Mémè ndi mwena Kilistò.” Pàdi ànu dilabula dyèbè dikùmbanangana mu Dìyì dyà Nzambi ambà nè: “Mémè ndi mwena Kilistò.” Cintu cikwàbò kanà cyònsò, mùshindù wùmwèwùmwè awu.

**Paudi wandamuna ku elu nunku, bu wèwè mwà kuswà nsambidilèku bwà ncìmunè eci, bu mùndi nciyì mu mémè mwinè to.**

<sup>69</sup> Nzambi àkupèèshèku bucìmunyi bwèbè, nànsha wèwè mwikàlè nganyi. Swàkù bwà meeji èbè awu àpinganè ànu buludi ku luseke lukwàbò alu àmba nè: “Mémè ndi mwena Kilistò; ndi mwena kwitabuuja. Sàtaanà, kwèna nè bukòòkeshi pa mémè to.”

<sup>70</sup> Bwà kwamba menemene, ndi mwimàne ànu mwab'ewu mene mpindyewu ngàmba cintu cìmwècìmwè aci, bwà kubenga kufwà cipùùkà mu cyambilu emu. Ncyà bushùwà. Mmisangu yinaayi anyi yitaanu yínkaadi mwàmbè kudishindila ku cyambilu eku. Aci's mbulelèlè. Nzambi mmumanyè nè ncyà bushùwà.

**389. Dìbà didi muntu ùdyúmwa bundù bwà bushàadile, anyi bundù bwà mùshindù kampàndà, mmunyi mùdiye mwà kucimuna cintu eci? Pa nanku, bu yèyè mwà kwikala nè mmwànà mulela nkààyà ke cìwà cilelè cyôci aci kwambwila ku bwànà bwèndè menemene?**

<sup>71</sup> Angàtà wèwè ànu menemene cidi cibèngangana nè cyôci aci. Wèwè mwikàlè misangu yònsò ujinga ànu cyùdi wèwè muswè aci, nè mwànà mukèsè mwengeleka awu ùdi yèyè muswè kwikala nè byònsò ànu mùdiye muswè, kùdimukà wèwè ùfilè byònsò byùdi naabi luseke lukwàbò. Wèwè mwikàlè mwena citù nè muswè kulama bintu byònsò, dìbà adi bangà kufila byùdi naabi abi. Nwamònu anyi? Enzà cintu kanà cyònsò . . . Enzà wèwè cidi cibèngangana naaci aci. Ke mùshindù wà kucimuna cintu kanà cyònsò ngwòwò awu, ke cishipa aci's.

<sup>72</sup> Wèwè udi nè . . . Maamù wanyì mukùlàkàjì, wa ku sud ùvwa nè ciibidilu cyà kwamba nè: “Myòsà yà paanyimà pàà mbwa mmîmpè bwà kuumusha lulengu lwà mbwa.” Nènku cyôci aci cidi citèèkiibwa mu bwalu ebu kàbidi.



nè pashiishe mvità yà Haamagiidona yidi yibùtula bintu byònsò yidi yikùtuka. Nè pashiishe, Mukàji-musèla ùdi wàlukila nè Mubàki bwà bidimu cinunu, bukòokeshi bwà Bukalenge bwà bidimu cinunu; paanyimà pàà aci kulwakù Cilumbulwidi cyà Nkwasa Mutòoke; paanyimà pàà aci kulwakù Maulu Mapyamàpyà nè Buloba Bupyabùpyà nè Cimenga Cipyacìpyà cìpweka cìfùmina kùdi Nzambi mu Dyulu. Cyendèlèlè nè cikondo bilamakana pàmwè.

**393. Nyumà Mwîmpè mmukwambile nè Mpungi kayèna yitàngila Mukàji-musèla to. Mpànzà yidi nè cintu cidi citùtàngila twètù anyi?**

<sup>76</sup> Nèngànji kwindila bwà kumòna Nyumà Mwîmpè ní ùdi ùcìbuulula mùshindù awu. Ncyèna ànu mwànji kumanya to.

**394. Mupròfeta wa Maalàki 4 ngwìkala mwà kubiikila bàshàadilè bàà Bisàmbà byà bendè bàà mu Bwàkabuulwibwà 7.9 bwà kupàtuka, nànsha mene mùdìbo bàpìcila mu cikondo cyà dikènga dinène amu anyi?**

<sup>77</sup> To, to! Paanyimà pàà—pàà Bwakabuulwibwa 7, ke mwàkamònàye binunu lukàmà nè makùmi ànaayi nè binaayi abi bitwibwe citampì, nènkù paanyimà pàà cyòci aci wàkamòna bènda bàlwa, cìvwà cyàlukila mmusumbà munène wà bantu bàvwà muntu nànsha umwe kàyì mwà kubadika bàvwà Mukàji-musèla. Nebiikalè nè. . . Kùdì. . . Maalàki 4 neàjikè nè Mukàji-musèla mwangàciibwe, nènkù. . . pashiishe. . . kasumbù kàà—kàà Eliyà nè Elishà aka kàalukila pa buloba bwà. . . Bwà èkèleeziyà kupìcila mu cikondo cyà dikènga dinène, kàdi Eliyà nè Elishà kabààkwìkala nè bwalu nè virgò mukùtākàne awu to (mbàà Bisàmbà byà bendè); nebàtumiibwè ànu kùdi beena Yuda nkàayaabò.

**395. Mikungulu mwandamutekète yidi mwomùmwè nè maalu masokoka mwandamutekète yikaadi mimana kubuulula anyi? Yìvwa mibuulula mu Bitampì Mwandamutekète, kàdi kayìyi myanji—kàdi kayìyi myanji kumanyika kutùdi bu Mikungulu anyi?**

<sup>78</sup> To, yàkabuuludiibwa mu Bitampì Mwandamutekète; ke cìvwa Mikungulu yàmba. Yìvwa nè cyà kubuulula. . . Mikungulu Mwandamutekète yàkapàtula mèyi àyi nè muntu nànsha umwe kàyìku mufwànyine kupàtula cìvwàyi. . . Yone ùvwa mumanyè cìvwàyi, kàdi bàakamukàndika bwà kucìfundayè. Yèyè nè: “Kàdi mwanjèlò wa mwandamutekète, mu matùkù à dyela dyà mpungi wendè, maalu masokoka mwandamutekète a Mikungulu Mwandamutekète àvwa nè cyà kubuuludiibwa.” Nènkù mwanjèlò wa mwandamutekète mmùsànjeelà wa Cikondo cyà Mwandamutekète cyà Èkèleeziyà. Nwamònu anyi?

**396. Udi witabuuja nè cikondo kumpàla Mukàji-musèla mukesè ùdi nè mwoyi neàdisangishè mwaba kampàndà pàmwè nè mwikàle nè bintu byònsò bisangisha pàmwè,**

**bu mwàkenzà Mukàji-musèla wa kumpàla, pàmwápa kumpàla menemene nè dilwa dyà Mukalenge Yesù mu matutu anyi?**

<sup>79</sup> Mpindyewu, mbankônké ní ndi nciitabuujá. Ncyéna mwà kucijaadikila ku Mifúndu to, kàdi pàmwápa nekúlwe cikondo, pàmwápa, ncyéna mumanyè to. Kùdi mwà kwikala ànu...Nudi numòna anyi? Bu byòbi nàнку, ncifwànyine kufila dimanyishiibwa dyà ditàmba kuseemena Dyèndè didi pabwìpi, bu mùdìbi nàнку...Yèyè nè: “Kàdi Yèyè neálwe bu mwìbi butùkù.” Nwamònu anyi? Ùdi ulwa ku...Bu mukàndà ungàakabalà pa bìdi bitàngila Juliet...*Romeo nè Juliet*, Yèyè ùdi ulwa nè—nè wàngata Mukàj'Èndè musèla butùkù. Mmwangàciibwe mu katanci kampàndà, mu mubùnyì wà dísù. Nwamònu anyi?

<sup>80</sup> Nè mbyà mpatà bikolè nè nebiikalè mùshindù awu, bwalu Bible mmwambè nè: “Nekwikalè bàbìdi mu bulààlù; Nèngàngatè umwe nè nènshiyè umwe; nè bàbìdi mu budimi, nè nèngàngatè umwe nè nènshiyè umwe.” Nwamònu anyi? Pa nàнку pàmwápa bóbò...Pa buloba bujimà, kabàakudisangisha mu mwaba nànsha wùmwe bwà kwikalabo nè bintu pàmwe to. Kàdi nebátangalajiibwè mu tusùmbu tukesè pa buloba bujimà.

<sup>81</sup> Ndi ngiitabuujá nè, pàmwápa bu Mukalenge mwà kwanyisha, aka nkasùmbù kakesè kàa ku Cyòci aci. Pàmwápa kakwàbò kasùmbù kakesè mu Ashe, kàngà mu Allemagne, kakwàbò ku lukwàbò luseke. Pangàakamòná cikèèná-kumòna cyà Mukàji-musèla dilòlò adi, Ùvwa musangishiibwe pa buloba bujimà. Nwamònu anyi? Pa nàнку Mukàji-musèla kààkusangishiibwaku ùmukila mu mwaba wùmwepelè to, Neasangishiibwè ùmukila pa buloba bujimà. Nèнку aci cìdi cishindika ànu menemene nè Dìyì, nè kacya Dìyì kaditukù dyànji kwikala dyà mashimi to. Nè too nè mpindyewu, nànsha cikèèná-kumòna ciinè aci kacitukù cyànji kwikala cyà mashimi to, bwalu cìvwa bilondèshile Dìyì.

**397. Nekwikàku muntu udi nè dibàtiiza dilelèlè nè dishùwashùwàlè dyà Nyumà Mwìmpè mu dibà edi wápanga kwikala mu Dyambwibwa dyà Mukàji-musèla anyi? Udikù mwà kuumvwija anyi? Twàmbilè citùdi mwà kukwenzela mu mùshindù kanà wònsò bwà kwambulwishakù bwà kupepeja bujitu abu.** Mpindyewu, kí mbyà bupòle anyi? Nwamònu anyi?

<sup>82</sup> To, kakwèna cintu nànsha cimwè cyùdi mwà kwenza mpindyewu mene to.

<sup>83</sup> Èyowà, beena kwitabuujá bashùwashùwàlè bàdi babàtiijibwe mu Nyumà Mwìmpè nebiikalè mu Mukàji-musèla. Mu bushùwà bwà bwalu, mbasòbola nè babiikidiibwe bwà kupàtuka. Virgò mukùtākàne awu kàvwa nè maanyì to. Bàvwà nè maanyì bàakabwela, kàdi bà... .

<sup>84</sup> “Ncinyi citùdi mwà kwenza bwà kupeepeja bujitu’s?” Èyowà’s, mwanèètù wa balùme, mwanèètù wa bakàji, udi mufunde eci awu, nsambidileku; ke cintu cidi citàmbe bwimpè cyà dyenza ncyôci aci. Twasàkidilaayi. Ncyèna dijinga nè mfrangà to. Ndi. . . Búngi bukumbàne bwà mfrangà yidi yibwela bwà kunkùba. Twasàkidila Mukalenge bwà bwalu abu. Ncyèna dijinga nè bilàmbà to. Misangu yàbúngi bantu batu bàmpèèsha bilàmbà byànyì bìndi mvwàla ebi. Nènkù balundà bàànyì nè bikwàbò batu bàmpèèsha bilàmbà. Nè bôbò. . . Ndi nè mfrangà búngi bukumbàne bwà kudiisha dikù dyànyì; ke cyôsò cidi citùkèngelà ncyôci aci. Mbimwènèke. . . Nènkù nudi mwà kunsambidila nànsha nànkù, bwalu ndi bulelèlè dijinga nè dikwàcisha dyà nyumà.

**398. Bidi bimwènèka munkaci mwà bambi bàà Dìyì, nè tudi nè bujitu bukesè ànyì katùyì mene naabù to bwà kusambila, bwà kuyiisha, bwà kujila byàkudyà, anyì bwà misùùkà mijimìne yidi mifwànyine kwikala ànu kuntwaku mu mwaba kampànda pa buloba. Bu wèwè mwà kuswà udiku mwà kutwàmbilaku cyà dyenza pà bìdì bitàngila ngiikàdilù ewu anyì? Twasàkidila wa manza tètè, Mwanèètù Branham, bwà bwalu ebu. Aci cidi nè cyà kwikala mwambi. Yèyè kí mmfùndapù dìnà nànsha òmwè bwà mèyì aa to.**

<sup>85</sup> Mwanèètù. . . Bìwva bikèngela bwà mèmè kuyàndamuna pàmvwà mucyòke, muzengèle, nè mwenze bu, nudi bamanyè’s, ncyiyikù ndyùmwa bimpè menemene to, pa nànkù ndi—ndi mutwìshìibwe nè cidi cyàndamuna nkonko. Ndi—ndi nzwèla twasàkidila wa manza tètè nè ndi—ndi mupwe mwoyi cìmvwà muswè kumwandamuna aci.

<sup>86</sup> Bayiishi, mwambi, bwà cinyi tudi nè bujitu ebu. . . katwèna nè bujitu bwà misùùkà mijimìne to. Ndi ngèèla meeji nè cidi—cidi dipanga dyà ditàbuluja. Ndi ngiitabuuja nè bìwva bikèngela bwà twètù kwikala ànu tuteeta bwà kulòmba Nzambi bwà kutupèèshayè majinga à misùùkà mijimìne too nè pààlwà Yesù.

**399. Mwanèètù Branham, udi witabuuja nè muntu yònsò udi nè Nyumà Mwimpè ùdi wàkula mu myakulu anyì? (To.) Ndi mumanyè nè wèwè udi wamba nè dyakula dyà mu myakulu—dyakula dyà mu myakulu kí ncileeki cyà Nyumà Mwimpè to. Ndi muswè. . . Kolintò wa Kumpàlà 12.30, bu wèwè mwà kuswà umvwijàku. Nudikù mwà kwangata Kolintò wa Kumpàla 12.30 anyì? Ngèèla meeji nè: “Bònsò bàdì bààkula mu myakulu anyì?” anyì bikwàbò; ncyèna mutwìshìibwe to. Nènteetè bwà kwangata lukwàbò pàdìbo munkaci mwà kwandamuna elu apa.**

**400. Mwanèètù Branham, udikù mwà kuumvwija Yobò 14.21 anyì?**

<sup>87</sup> Èyowà. Yobò 14 ùdi nè: “Muntu yéyè mufwè, neikalè cyàkàbìdì nè mwoyi anyi?” Kaa, muntu yéyè mufwè... Yobò, wàkula bwà dibìikà dyà ku lufù. Ngèèla meeji nè mvwa mupetè cyôci aci mu dindà adi, kî mmwômò anyi? Anyi mvwa kwà Charlie kwàka? Mándàmù Cox ùvwa ùsanganyiibwa mwaba kampàndà. Yobò, wàkamòna mùvwà bilòngò bifwa nè byàngatulula kàbìdì mwoyi, kàdi muntu yéyè wàkaya mu buloba kàdi kàyì mwà kwalukila to. Nè pashiishe bàakamuumvwija nè cintu kampàndà civwa cyenzè mpèkaatù. Ùvwa dijinga nè mutwàngaji pankaci pèndè nè Nzambi, nè pashiishe kumònyè dilwa dyà Mukalenge.

<sup>88</sup> Ncinyi aci, mwanèètù? [Mwanèètù Branham ùdi ùyiikilangana nè mwanèètù wa balùme kampàndà—Muf.] Ngèèla meeji nè ùvwa n’Kolintò wa Kumpàlà 12.30. Èyowà!

“Bònsò bàdi bàakula mu myakulu anyi?” Ke címvwà ngèèla meeji nè ke civwàku, kàdi ncivwa mutwishiiibwe to, mùmvwà mucyòke mùshindù ewu, kàdi... To! Bònsò kabàtu bàakula mu myakulu to; bònsò kabàtu bàndamuna to; bònsò kabàtu bàmba aci to. Nè pashiishe nshapità mwinè udi ulonda awu: “Nànsha mèmè ngàakula mu myakulu yà bantu nè yà banjèlò kàdi nciyi nè luse to, ndi cintu cyanààna.” Nwamònu anyi? Pòlò, mu ngaakwilù mukwàbò, ùbàmbila nè: “Bònsò bàdi bàakula mu myakulu anyi? Ncyà bushùwà nè, kabèèna bàakula to. Bònsò bàdi bàmba cipròfetà anyi? To. Kàdi jingàayi nè mwoyi mujimà mapà matàmbe bwímpè; nènku ndi nnùleeja njila mutàmbe bulenga.” Nwamònu anyi? Bònsò kabèèna bàakula mu myakulu to.

**Newikalè mwà kwenza disangisha dikwàbò dyà dijingulula kumpàlà kwà wèwè kuumuka kuya anyi? Kabiyi nànkù to, kùdikù mùshindù wà kwenza muiiki wà bàbìdì anyi?**

Ndi ntèkemena nè uvwa naawù. Mpindyewu, ncicyèna naayi yàbùngì menemene to. Lekèlaayi nteetèku bwà kuyàndamuna ní kùdi mùshindù.

**401. Ndi mvùluka nè mvwa mukuumvwe wakula bwà bwalu bwà bwèna luse búvwà mumòne bwà mwanjèlò... bwà mukankù ùpaapala mu nsànji kampàndà, ùlwangana bwà kulekediibwawù. Ndi nè maamù munanga mu ngiikàdilù awu. Kèna nè dyanishya dyà kwakidilakù bàna bèndè bàsàtù basèla kumbèlù kwèndè to kùkaadi bidimu bisàtù bijimà, bwalu kî mbaswè kukòokela ku dilongesha dyà tatwàbò to. Yéyè mmuyiishi wa cyena màngumba. Maamù mmuswè kuumvwa Mukenji wà cikondo cyà nshiiikidilu ewu, nè mèmè ncyèna nànsha mwà kumufùndila mukàndà to. N’too nè mu cipidì kaayi mùdiye nè cyà kukòokela? Kùdikù cintu cìndì mwà kwenza pa kuumusha kusambila anyi?**

<sup>89</sup> Aci ncifwànyine kwikala cintu cìmwèpelè cìndi mufwànyine kumanya. Bàyendè, bu mùdiye mwambi, kààkumulekela ùmvwa Dìyì to. Yèyè mmuswè kuDyùmvwà, kàdi kèna ùmwanyishila bwà kuDyùmvwayè to, nènku musambìdilaaku ànu cyanààna. Ndi ngùtabuuja nè mukàjì ewu mmu—musùngidìibwe, mu bushùwà bwà bwalu.

**402. Mwanèètù Branham, bidi mwà kwenzeka nè muntu àjimine nè àkashùikidilè mu ifernò yèyè mubènge Bukènkè bwà Dìyì, nànsha yèyè mwikàle nè dilabula dishùwashùwàlè dyà dibingishiibwa nè dijidiibwa anyi?**

<sup>90</sup> Èyowà's, mukalenge! Aci's ncyà bushùwà menemene.

**403. Paùdi ukwàta mudimu nè cyakwidi cyà nè twètù katùyì twitabuuja Dìyì to, netwikalè batàpùlùke cyendèlèlè nè Kilistò, udi uswa kwamba nè virgò mukùtākàne neikalè nè mwoyi cyendèlèlè, kàdi nebàtapulukè bùumuka mu Yelusàlèma Mupyamùpyà mwikalà Kilistò musòmbèle nè Mukàjì-musèla amu anyi? Aba ke bàdi kabàyi nè Nyumà Mwimpè, balediibwe cyàkàbìdi mùdi Mufùndu wàmba bwà kwikala balediibwe cyàkàbìdi. Dilediibwa dyà mu bufùki dyòdi dilòmba màyi, mashi, nè nyumà, dilediibwa dyà nyumà kadyènakù dilòmba bitùpà byònsò byà ngàsà bisàtù ebi kumpàlà kwà muntu kwikalayè mulediibwè cyàkàbìdi anyi?**

<sup>91</sup> Kakùyì mpatà to, ngáfumu ku dicyùmvwija mu dindà emu, byà mwomùmwè, pa cintu cìmwècìmwè aci. Bikèngela wikalè nè bitùpà byònsò. Udi mwimicìibwe kùdi Nyumà, ànu mùdi mwànà wa mu dibòkò mwimicìibwe, nè munda mwà maamù amu, kàdi kabàyi balediibwe to too nè pàdìbo bapetè Nyumà Mwimpè. Ncyà bushùwà. Udi mulediibwe dìbà adi. Kwèna mukùdimùne mucìma to, udi mu nshintùlùkilù wa diikala mukùdimùne mucìma too nè ku cikondo aci.

<sup>92</sup> Ke bwà cinyi maalù masokoka manène ònsò aa kaàvwakù mwà kufidiibwa kùdi Luther to, kaàvwakù mwà kufidiibwa kùdi cikondo civwà cifuma ku dipita to, cikondo cyà beena Mpetà. Bwà cinyi? Kacìvwa cikondo to. Bàvwa biimicìibwa. Mpindyewu, Mupèrsonà wa Kilistò, Yèyè mwinè, Mwànà wa muntu (nudi bumvwè anyi?) mwikale uDibuulula mu mubidi wa buntu, kacìvwa mwà kwikala cyenzèke to too nè mpindyewu.

**404. Pàabàngà Bukalenge bwà bidimu cinunu, beena bupidyà nebùumushiibwè bìshi pa buloba?**

<sup>93</sup> Beena bupidyà nebàpweke mu cikondo cyà dikènga dinène nè virgò mukùtākàne awu, nè bakwàbò bònsò abu (beena bupidyà, nè virgò mukùtākàne awu), nè bàshàadilè bàà Izalèlèlà bàdi nè cyà kuumushiibwa abu.

**405. Mwanèètù Branham, pàdi bàmwè bàà...pàdi muntu ùnyobola anyi “ùndyata pa bàna bàà nkàsà (Elu**

ndufwànyine kwikala lwîmpè.)—**ùndyata pa bânà bàà nkàsà,**” **mwàkambàbo kale wàwa, ciiji cyànyì cìdì cijuuka; mmunyi mùndì mwà kucimuna cintu eci? Ndi mumanyè nè nebhikèngele bwà Mukalenge kucyènzayè, kàdì cìndì mwà kwenza mu mwoyi wanyì ncinyi? Ncyèna muswè cintu eci to.**

<sup>94</sup> Tuuyîsha ciiji cyèbè nè disambila, pashîshe angàtà dipangadika. Kuntwaku...Ncyèna ncinka nè kùdi bantu bààbûngì munda mwà nzùbu emu bàvwà nè ciiji citàmbe cyànyì to twamb’eku twamb’eku. Kaa, mvwa—mvwa nè mishiku misùnsula dîbà dyònsò. Nè mvwa—mvwa—mvwa mwà kudiila byàkudà byànyì ku lùsonà misangu yàbûngì.

<sup>95</sup> Màmù wanyì, bu munùdì bamanyè, ùvwa citùpà wa mu ba-Indiens, nè taatù wanyì uvwa Irlandais, kàbidì Irlandais wa ku Kentucky. Nè yònsò wa ku...Bùbidì bwàbò bàvwa nè ciiji cikùmbàne bwà kwimanyika mwelè wà mabaya ùvwa ùnyùnguluka. Nè misangu yònsò mishikù yànyì yìvwa ànu misùnsùke; mèmè mwine mvwa wa kanyikanyì. Nèku bàvwa bàntùntumuna bàmbyànkula panshì. Nè mvwa mwà kujuuka kàbidì kuulu; nè bàvwa mwà kumbyànkula panshì kàbidì too nè mùmvwà nshààla mukùmbàne mwà...nciyì mukùmbàne mwà kujuuka kàbidì kuulu nànsha. Ke mùtùbì misangu yònsò. Nè pashîshe pangàakapetà mùshindù wà kujuuka, mèmè kujuuka cyàkàbidì; kumbyànkulabò kàbidì panshì. Pa nàнку ke mùshindù wùvwàbì bwanyì mèmè.

<sup>96</sup> Mèmè kudyàmbidila nè: “Ncyènakù mwà kwikala mwena Kilistò nànsha.” Kàdì pàakabwelà Nyumà Mwîmpè mu nsòmbelu wanyì, aci kukòsaci bwalu. Kakùciyì kàbidì... .

<sup>97</sup> Kùvwa mukàjì kampàndà musangu kampàndà; mvwa muyè bwà kukòsa nzembu. Nè mu matùkù awu ncìcivwa nè nsukì pampalà pa mutù wànyì apa. Yèyè nè: “kaa wèwè kakùtàkàne kàà nsukì ciputu ku mutù aka!”

Mèmè kumwambila, kwamba nè: “Mukàjì, kabìvwa bikèngela bwà wèwè kungela mulawu mùshindù awu to. Kaa, kwènà uciinàkù Nzambì anyi?”

Yèyè nè: “Kaa wèwè, kakùtàkàne kàà nsukì ciputu ku mutù aka, bu mèmè njinga muntu kampàndà wa kwakula nendè bwà bintu byà mùshindù awu, Ncìvwa mufwànyine kwangata cidindingingi bu wèwè ewu to.”

“Oooh!” Pashîshe è kumpendayè bipendu byà ku *bilamba*, byà ku *bilamba*. Kaa ekèlekèle, bu wìkala mucìngambapù cidimu cijimà kumpalà’s wè! Mvwa ngàmbe misangu yònsò nè: “Muntu mulùme udi utuuta muntu mukàjì kènà nè bukolè bukùmbàne bwà kutuuta mulùme nendè to,” kàdì mvwa—mvwa mufwànyine kwikala munyangàkàje cyôci aci dîbà adi mùvwàye ùpenda maamù wanyì bipendu bibi mùshindù awu. Kàdì nudi bamanyè mùdì bwalu anyi? Kacyàkantonda nànsha kuntonda to. Mèmè

nè: “Nênkusambidilè.” Kacya ncìvwakù mutàcishìibwe to... Mémè kumanya ànu mwaba awu nè cintu kampàndà cìvwa cingenzèkèlè. Eyowà’s, mukalenge! Kaa, ekèlekèlè!

<sup>98</sup> Nudi bamanyè maalu mabi âmvwà mwenzè pancìvwà mwànà apu, ndwangana mvita! Mvwa mwambe kushipa bantu bàtaanu musangu wùmwè. Mémè è kwangata cingoma kupàyamù māsashì dikùmi nè àsambòmbò, nènku pàvwà bansongààlùmè abu bankùme bwalu mvwa mwena Kentucky, kakùyì bwà búnga bwalu to... Ncìvwa nànsha mwà kushààla mwelè mutù wànyì muulu to. Umwe ùvwa mufwànyìne kunkwàta nè byanza mùshindù ewu, nè mukwàbò mufwànyìne kwimana mwaba awu nè dibwe mu cianza cyèndè nè kuntuuta bintu kwìsù, mu mùshindù wà ncìcìyì kàbidì nè mwoyi to. Kakùyì cintu nànsha cìmwè pa buloba... .

<sup>99</sup> Bàvwa bàmbiikila nè “Indien wa kànàkànà wa ku Kentucky,” bwalu mààmù wanyì, pàcìvwàye nsongààkàjì, ncyà bushùwà nè ùvwa ùmwèka bu Indienne (mvwa munkacì mwà kutàngila fòtò wendè kùkaadi ntàntà), nè bàvwa bamanyè nè yèyè ùvwa citùpà wa ba-Indiens. Nènku bwalu mémè mvwa wa mu Kentucky nè yèyè mwikàle mwànà mukèsè wa ba-Indiens, ke kumbiikilabò nè “mwànà mutekète wa ba-Indiens, mwànà mutekète wa ba-ndiens bàà mu Kentucky.” Nè ncìvwa nè cintu nànsha cìmwè pa buloba apa cyà dyenzamù to; ncìvwa nè cìmvwà mwà kwenza to bwalu ndi mulediibwe mu Kentucky.

<sup>100</sup> Ngákaya mu kàlaasà kuntwaku, wa bwalu awu ncìvwa nè bilàmbà byà kuvwàla to, nè nsukì yànyì mimpwekèlè ku nshingù. Ke Papa... Maman kwangatayè nkooci wa kale wa Papa uvwayè mubwelè nendè mu dibàkà awu, è kumukòsayè kungenzela mùpanù wà mémè kuvwàlà mu kàlaasà bwà wànyì musangu wà kumpàlà. Nènku ndi... Nè kumvwàdikayè nshèshetè yìbidì mitòòke nè bisàbaatà byà banàyì bàà ndundu. Ke kwambabò nè: “Wèwè ní kwena umwènèka bu ‘mwena cikukumina’ wa ku Kentucky to.” Nè—nè bònsò... nè cyòci aci... nè pashiishe, aci kutùngunuka àànyì ònsò—matùkù àànyì ònsò à kàlaasà.

<sup>101</sup> Nènku bansongààlùmè kampàndà, bwalu mvwa ngènda mpweka nè njila pàmwè nè nsongààkàjì kampàndà mutekète nè mvwa mumwambwile mikàndà yèndè... Kabàvwa baswè bwà mémè kwenza cintu aci nànsha, ke kutwilangana naanyì kwìnshì kwàka è kuntutabò bikolè too nè mungàkajimijà lungènyì. Mémè è kubàmbila nè, bòbò ànu mwà kundekela nya, mémè kulaya nè mvwa mwà kuya ànu buludi kumbèlu. Ke pashiishe kwangatabò... kundekelabò, kuntuutabò misèbà misangu yìnaayi anyì yìtaanu, kumbyànkulabò panshì, kàdi è kungelabò nzàdi kwìsù kònsò eku. Ke mémè kwalukila kumbèlu, mùshindù ewu, ngènda mpìcila mu budimi bwà masele à mpoopo.

<sup>102</sup> Mvwa nè cingoma cyànyì cikesè cyà Winchester .22 cyeyeka

ku ciibi. Mémè kuujuuka è kwambula cingoma aci cyùlè tèntè nè mäsashì, mémè è kuya dyàkàmwè kupicila mu cifufu cyà tuumici twà misesa yà mèbà, è kusokoma ku luseke lwà njila too nè pàakalwa nsongàalùmè yitaanu anyi yisambòmbò eyi kuntwaku. Mémè kushàala mwindile ànu cyanàanà too nè pàakalwàbo, nè pàvwàbo bènda bàlwa mwaba awu apu, bènda bàyiikila, bàmba nè: “Mwena Kentucky awu neàmanyè kùdiye úsanganyibwa kuumukila ànu ku cyòci eci,” bàtùngunuka ànu mùshindù awu.

<sup>103</sup> Mémè è kudyòsoka nè ndéndè wa cingoma mukòka. Mémè nè: “Mpindyewu, nganyi wa kunùdi udi muswè kufwà dyàmbedi, bwà kubènga kumòna bakwàbò abu to?” È kutwàdijabò kwela mikunda; mémè nè: “Kanwèdi mikunda nànsha, bwalu nufwàfwa bònsò ku umwe ku umwe.” Nènku mvwa ngàmbilamù! Nènku ke ànu pa dībà adi kutwàdijabò kwela mikunda. Ke mémè kulònta takàlàkàà! Cingoma kufùnkaci. Mémè kwelamù mutèlèngè mukwàbò. Takàlàkàà, cyòci kufùnkaci; mutèlèngè mukwàbò, takàlàkàà, è kufùnkaci. Nènku mémè è kutùnkumuna mitèlèngè dikùmi nè yisambòmbò panshì. wònsò wà ku yòyi è kufùnkawù. Ke bansongàalùmè abu kuyabò lubilu lwà manza àbidì, bènda bèèla mikunda, bàpulumukila ku lukwàbò luseke lwà kakùnà, nè bikwàbò byònsò.

<sup>104</sup> Ke paanyimà pàà bòbò bamanè kuumuka, mémè kwimana mwaba awu. Pàmvwà nè cijji cicolè, mu mùshindù wà nè ncì—ncì—ncìvwa mwà kudila to, mvwa mwà kuseka bu cidingidingi nè binsònji bimpàtuka mwísù mwànyì emu. Mpindyewu, aci’s ke cijji. Bu kabùyì bwà Nzambì to, nùnkù’s mvwa mwà kwikala mushebeyanganyi.

<sup>105</sup> Nènku mémè è kwangula mitèlèngè ayi è kuyàluja mu cingoma, nènku, “ Pwà, pwà”; àvwa mwà kuteema ànu bìmpè ebi bu pa ciibidilu. Nwénù bàdi bàakula bwà ngàsà’s!

**406. Baavirgò bakùtàkàne abu bàdi penyì mu Bukalenge bwà bidimu cinunu?**

<sup>106</sup> Mu Bukalenge bwà bidimu cinunu bàdi mu lukità. “Bafwè bakwàbò kabààkiikala nè mwoyi to munda mwà bidimu cinunu.”

**407. Nèkwikalèku, anyi kùdikù mpindyewu mwaba kampàndà bwà Mukàji-musèla kukùngwila pàmwè bwà kwikala nè mwoyi, bu mwàkalombola Mòsà bánà bàà Izalèlèla amu anyi?**

<sup>107</sup> Nengàdamunè lukonko alu bwènù nwènù; cidi cifùma ku dibuuludiibwa kùndi. Nènnwambilè bulelèlè. Èyowà’s, mukalenge! Kùdi mwaba bwà Mukàji-musèla yònsò kusangilayè. Nudi baswè kumanya nè mpenyì anyi? Mmu Kilistò. Bulelèlè. Kudisangisha ànu muntwamu; tudi bònsò pàmwè.

**408. Bwà cinyì tudi tutàmba kwakula bikolè pa mvwàdilu wa bakàji (Kaa, kaa, bàdi bàntàndisha pa cyòci eci, kì**

mmômò anyi?)—kwakula bikolè pa mvwàdilu wa bakàji nè ndongólwèlu wa nsuki yàbò, nè kwenza. . . kakuyi cintu nànsha cyambiibwe pa bìdì bitàngila nsukì yà muntu mulùme anyi pa mùshindù ùdiye ùlwàta?

<sup>108</sup> Èè, mwanèètù wa bakàji, néntwe ku cyèbè pa cintu cimwèpelè. Cyàkumpàlà, Bible mmwambè nè kabìvwa bikèngela bwà muntu mulùme kwikalayè nè nsukì mile to. Nànku yèyè mwikàle nè nsukì mile, ndi mufwànyine kumwambila, ànu byà mwomùmwe nè mûndi nzwàmbila emu. Mmupìile. Kàdi bantu balùme bààbùngi, bààbùngi bàà kùdìbò bàdi bu mmùndi emu, kabèèna nànsha naayi to. Kàdi bantu bààbùngi bàtu bàkòsa nsukì yàbò, bàmwèka bu bantu balùme. Nènku mpindyewu, bu bòbò kabàyi bacyenza to, tuvwa mwà kwikala babambile bwà kubèngabò kwenza nànku, kulekela nsukì yàbò yileepa bu mùdì nsukì yà mukàji. Nenùpete byònsò ebi mu malaya à dibàkà nè difwà dyà dibàkà nè bikwàbò patwàyiishàpu. Cyena bwalu cinène bu mùdì mvwàdilu wa muntu mulùme. . . anyi wa muntu mukàji. . .

<sup>109</sup> Mpindyewu, muntu mulùme, cyàkumpàlà, mubidi wà muntu mulùme kawèna butèyi bu mùdì wà muntu mukàji to. Mpindyewu, muntu mulùme, mikòlò yèndè yà kale, minène, yà myòsà ayi, nè binù mapùndà, nè difù ditùntàmàne, nè byònsò, s'mbukoooya bwà menemene pa kumumòna; nè kakwèna cintu nànsha cimwè cyà butèyi nànsha. Ndi ngèèla meeji nè ùdi ùmwèka bu “wa ùsekeshangana” patùdi ànu tutàpa dísù bwà kumòna bantu balùme aba bènda bàpwèka nè njila, ní mbansongà anyi banunu, bàvwàle bikini pambidi, ní ncinyi apa, nudi bamanyè's, bènda bàpwèka nè njila. Ndi ngèèla meeji nè aci ke cintu citàmbe kukooyika menemene cinkaadiku mumòne. Ncyà bushùwà. Ngèèla meeji nè yèyè—yèyè kí mmumanyè nè ngwa luseke kaayi to (nwamònu anyi? Ncyà bushùwà's!), muntu mulùme udi mufwànyine kwenza cintu bu nànku awu.

<sup>110</sup> Kàdi nudi bamanyè mùdì bwalu anyi? Ndi mfùma ku ditèeleja kùkaadi ndambù wà ngondo nè, Cilwilu cyà Àmèrikè necivwalè mùshindù awu. Èyo! Cilwilu necipatukà cidimu cyàlondà, anyi paanyimà pàà cidimu cyàlondà, bònsò bavwàle tùpùutùlù. Mmusùmbà bunène kaayi wà bijangayi utwikalà mwà kupeta?

<sup>111</sup> Nzambi wàkenza muntu mulùme bwà kumwèka bu muntu mulùme, nè kwenza maalu bu muntu mulùme, nè kuvwàla bu muntu mulùme. Yèyè wàkenza muntu mukàji bwà kwenza cintu cimwècimwè aci, kuvwàla bilàmbà bu muntu mukàji, kwenza maalu bu muntu mukàji, nè kwikala bu muntu mukàji. Bwà mu dindà emu, bwà bìdì bitàngila. . . Lukonko ndujùkè bwà bìdì bitàngila muntu mulùme. . . [Cibadi cimwè cyà mukàbà wà mèyi cidi cìjika mu mùshindù wà kawùyì mukùmbàne nè cibadi ciibìdì cidi cìbanga mu mùshindù kawùyì mukùmbàne to—Muf.] . . . Yèyè muswè bwà. . .

112 Muntu mukàji yêyè cyà bushùwà nè nsukì yà tunjingambààlà, nè muswè kuvwàla cimwè cyà ku “bifulu” anyi mwònsò munùdi nucibiikila amu, Ndi ngèèla meeji nè. . . Mukàjàanyi ùtu ùcivwàla. Cìdi. . . Udi wamba nè nsukì yèndè nyà tunjingambààlà, nènku yêyè ùdi nè cintu kampàndà cyà mùshindù awu cyà bunène abu cidijingila, cimwèka bu cintu cinène menemene, cìswikwità cyalàbàle. Nènku ùdi ùjingilamù nsukì yèndè nè wàsamù bikànu. Nènku mpindyewu, kùdi. . . Ku dyànyi dimòna, aci—aci kacyèna nè bubì to pàdi ànu nsukì yèbè mile.

113 Mwambi kampàndà ùvwa wamba nè mukàjèndè ùvwa—ùvwa mupiiishibwe, bwalu ùvwa nè—nè nsukì yèndè myela meekala. Ke mèmè kujandwila ku lukonko kampàndà, nè aci cìdi cìswa kwamba nè mùkubù anyi dyela dyà meekala mu nsukì yèndè. Ncyèna mwà kwamba nè abi mbibì to; ncyèna nè cintu nànsha cimwè pa bwalu abu to. Yêyè nè nsukì mile, ke cyònsò cìndi mwà kwamba pa bwalu abu.

114 Nènku mpindyewu, muntu mulùme kampàndà. . . Muntu ewu mmwambè mu dindà emu bwà kwikala ùmusha nsukì yèndè, nè ùyìpingaja kàbidì. Mpindyewu, eci ncyenzè bu cìdi apa kàbidì, bwà bwalu bwà dikòsà dyà nsukì. Nwamònu anyi?

115 Mpindyewu, muntu mulùme yêyè—yêyè kàyi nè nsukì to, nè mukàjèndè. . . Nkàadi mumvwè bakàji bàmba nè: “Èè, bu mèmè ànu mwà kwenzaku nè John. . . Ndi ngèèla meeji nè ùdikù mwà kumwèka bimpè bitàmbe bu yêyè—bu yêyè mwà kuvwàla kafulu kàà nsukì aka. Udi wela meeji kaayi bwà bwalu abu, Mwanèètù Branham? Mbibì bwà yêyè kucyènza anyi?” To, mukalenge! To, nànsha kakesè, kì mbibì to, nànsha kakesè. Yêyè muswè kukàvwàla, mbimpè, bìdi ànu mùdi kwashisha mènù àà cyamù emu anyi cintu kanà cyònsò cìdi mwà kulwa aci.

116 Byòbi biinè, ndi nè mènù àsàtù à cyamù mèmè mwinè. Mvw’á kujingakù bwà nciiikadikù naawù to. Mmaashila ku lukànu; àdi ànu àmpwekesha dīyì, nè àntàpa ku ludimì, nè bikwàbò byònsò, kàdi ndi nè cyà kwikala naawù bwà mèmè kudyà. Kàdi mèmè mwikàle. . . Pàndi mpàtùka nya dyàmwàmwà dyà mbù mu masangisha à pambèlu, ntu mvwàla kafulu kàà nsukì; kabiyì bwà mmwènekelu wakù, bwalu nudi bamanyè nè ndi mufwànyine kwimana ànu mwab’ewu bu mèmè ncīyì nè lusukì ku mutù kwànyi eku anyi ní ncinyi cyònsò civwàku aci. Kabyèna mwà kunshitulula to; ndi mwab’ewu bwà kuleeja mpàla wa Yesù Kìlistò. Kàdi pàndi ngùmana pambèlu pààpa, mu dilòlò dyàkumpàlà mu yimwè yà ku mpeepèlè mikolè yà ku bitùpà byà luuya lukolè, dilòlò didi dilondà muminu wànyi ùdi wùsaama bikolè mu mùshindù wà ncīyì mwà kupàtukamù to.

117 Nànku dībà adi, bu—bu nè civwa ncintu kampàndà cimvwà muswè bwà kucyènza, nè mèmè kudyumvwa bwà kucyènza, mvwa mufwànyine kucyènza. Eyowà’s, mukalenge! Kakwènakù

cintu nànsha címwè cidì cyàmba nè kucyènji to. Cintu nànsha címwè kacyèna cyàmba to, mwanèètù wa bakàji, nè kwèna mwà kuvwàla kafulu to, anyi disàkidila dyà nsukì, anyi cintu kampàndà anyi cikwabò mu webè. . . Abi bìdi ànu bimpè menemene, kàdi lekèlàn nsukì yèbè yishaalè mile. Nè wèwè muntu mulùmè, udi ukòsa yèbè. Yùdì naayi ayi, kuyilama mikòsa. Nwamònu anyi? Dìbà adi, aci ncikòse bwalu.

<sup>118</sup> Nènku mukàji, udi uvwala bilàmbà bu muntu mukàji. Nè mulùmè, udi uvwala bilàmbà bu muntu mulùmè, kùteeci kwikala cilùmacikàji nè kuvwàla bilàmbà byà bantu bakàji to. Nè nwènu bantu bakàji, kanùteeci kwikala mùdi bantu balùme nè kuvwàla bilàmbà byà muntu mulùmè nànsha, bwalu Nzambi kî mmuswè bwà nwènu kucyènza to, Bible ùdi ucipiisha.

<sup>119</sup> Kàdi mpindyewu, bwà divwàlàn dyà nsukì anyi divwàlàn dyà nsukì kampàndà. . . Èè, ncinyi cyà ku “tufulu” atu? Ndi mwènzè ntùpàkànyì kùkaadi katanci anyi cintu aci “nkose” anyi? Nci—ncintu kampàndà—ncintu kampàndà cidì mu—muntu mukàji wàsa mu nsukì yèndè bwà kuyivwija yimwèka mitàmbe. . . Nànsha ciikàlè cinyi (nwamònu anyi?), kakwèna cintu nànsha címwè cibì mu cyòci aci to. Tùngunukàayi nè kuya kumpàlà, bìdi ànu bimpè.

**409. Mwanèètù Branham, mwanèètù wa bakàji kampàndà mmulwè ku tabernacle ùfùmina mu ntàntà wa kilòmèètà cinunu nkàmà yibidi nè makùmi mwandamukùlù, ke mukàji awu kwambayè mùvwàye mwitabùùje nè wèwè udi Yesù Kilistò mwandàmùke mubidi. Swàkù wàkulèku pa bwalu ebu. Ùvwa menemene (m-u-b-ù- . . .) mubùle lutùlù mwikàle ùteeta bwà kwambila bakwàbò cidiye wèla meeji aci. (m-u-b-ù-l- . . .) Dìbùla lutùlù. Mwòmò.**

<sup>120</sup> Mpindyewu, mu bushùwà bwà bwalu mwanèètù wa bakàji awu ùvwa mupilè. Mémè ncyèna Yesù Kilistò to; ndi musadidi Wendè. Tukàadi bapicile mu cyòci aci misangu yàbùngi. Kàdi. . .

Kaa, nkàadi nseemena pabwìpi menemene mpindyewu; nùnsambidìlaayi ànu cyaààà, ànu katanci kakesè kàbidi.

**410. Mwanèètù Branham. . . (Nudi mwà kuswà bwà kuumvwa yidì mishààle eyi nè—nè lùkàsà lwònsò anyi?) Mwanèètù Branham, musangu kampàndà ngàkapangila Nzambi kumpèèsha. . . ngàkadyùmvwa nè Nzambi mmumpèèshe mulayi wà bwena wà Sarah awu. Kùvwa lukonko kampàndà, kàdi mulayi wàkalwa pashìishe. Wùvwa mmulayi wà Nzambi anyi? Ndi mumanyè nè ki mùvwà wa Sarah, kàdi ndi ndyùmvwa nè dìbà nditàmba kuya. Tudi banangè mudimu wèbè wà bwambi nè Ewu udi mukubiikile (Aci’s ncyà kalolo, kî mmwòmò anyi?)—banangè mudimu wèbè wà bwambi nè Ewu Udi mukubiikile bwà cyòci aci, nènku ke bwà cinyi, tudi bakunangè. Kaa, bàvwa bàfùnda dìnà dyàbò.**

Twasàkidilaayi, mwanèètù wa bakàjì nè mwanèètù wa balùme. Lukonko, èyowà, èyowà's. Èyo.

<sup>121</sup> Mpindyewu, Nzambì...Elà meeji nè Yèyè wàkupèèshi mulayi awu, nè kwenzekabi bu Sarah. Bushunwà, n'Nzambì umweumwe awu; Yèyè utu wàndamuna mùshindù wùm wèwùm wè awu. Kanwìtabuuji kù cìngà cintu to ànu nè ùvwa wà kùdì Nzambì.

**Mwanèètù Branham, ndi muswè kukukonkakù ndambù wa nkonko pa bìdì bìtàngilà Bible. Bu wèwè mwà kuswà umvwijaku Maakò Munsantu . . .**

Nkààdi mupetè lólù alu; nkààdi mulwandàmùne, Maakò Munsantu 16. Tuvwa balwandàmùne ditùkù adi, ndi mvùluka. Tùmonèbi.

**411. Mwanèètù Branham munanga, bu wèwè mwà kuswà umvwijaku Maataàyi Munsantu nshapità wa 22, mvensà, pàdì . . .**(Tuvwa bandàmùne alu. Nwamònu anyi? Nudi bavùlùke ditùkù adi anyi? Nènnù—nènnùleejèci. Mvwa . . . Nudi nucimòna kaaba aka mene, 22.) **Mmunyi mùvwà mwenyi ewu mubwelè mu Didya dya Dibanji, uvwa muvwàle civwàlù kampàndà, kàdi kàyi muvwàle cimwè cyà ku civwàlù cyà dibanji?**

<sup>122</sup> Vùlukàayi, mèmè nè . . . mèmè kwenza bu wedi minèku mikesè; mèmè nè: “Mwanèètù wa cyena-màngumba wàkalwila ku—ku . . . wàkalwila ku dididiishi kàdi kakùyì ku Ciibi awu.” Ciibi n'Diyì.

**Wèwè kwamba nè Kaayinà ùvwa wa dimiinu dya nyòka. Bwà cinyi Evà wàkamba nè: “Ngàapeci muntu ùfùmina kùdì Mukalenge”?**

Aci's ke cìmvwà nteeta bwà kupeta mu dindà emu. Ndi nè Mifùndu mifùnda kaaba aka bwà cyòcì aci. Ndi mwà kwikala munkacì mwà kwenda kwalukila ndambu ku yìkaadi mipìte; ndi ntèkemena nàнку. Ngènda mpeta mikwàbò kaaba aka . . .

**Mwanèètù Branham, bàyaanyi, uvwa mukolèshùbwe mwena Kàtòlikè, mu dikuukwila dyètù yèyè mmuswè kukuukwila mu wèndè mùshindù.**

Nkààdi mwandàmùne alu. Nudi bavùlùke anyi?

Kaa, ndi ngàngata eyi nùнку mwab'ewu mene mpindyewu. Nkààdi mwandàmùne alu.

**Mwanèètù Branham, ndekeelu wa byònsò ndi . . . bwà kuswishakù mwanèètù wa bakàjì ku di . . .**Nkààdi mwandàmùne alu. Inàbànzà kampàndà ùvwa nè mwanààbò wa bakàjì mwena Kàtòlikè.

**Mwanèètù Branham, mu Timòtè Mwibidì 4, ndipà kaayi dyàkafidiibwà kupicila ku . . . ?**

Nkààdi mwandàmùne alu. Mbanganyi bàdì bayivùlùke? Ndi nè yimwè yà ku yôyi misambakaja mwab'ewu. Nwamònu anyi?

**Mbikùmbànàngàne nè mikenji bwà twètù kukwàta mudimu nè mùshindù kanà wònsò wà . . . ?**

<sup>123</sup> Aci's ndikòntonona dyà kulela. Ndi—ndi . . . Ngànji nyiikilanganè neenù pàà—pàà nkààyanyi pa cyôci aci (nwamònu anyi?), mung'àmbì mu dindà emu amu.

**Dyàmbedi, baavirgò bakùtàkàne bàtaanu abu mbasungidùibwe mu cikondo cyà . . . ?**

Nkààdi mwandàmùne alu. Ndi munkaci mwà kwalukilapù. Indilaayi katanci kakesè, tükijààyikù naanyi.

**Paanyimà pàà bamanè kumanya njila, nànshapù njila wa kanyinganyinga nè dijidiibwa** (Nkààdi mwandàmùne alu, nudi bavùlùke anyi?), **pashiishe kupangila kuumukila ku cyôci aci . . .**

Nkààdi mwandàmùne alu kàbìdì. Ndi mwenzè bu muyaalùje paanyimà. Nengiikalè ànu mwà kuyàngata bu . . .

**Mwanètù Branham, ncinyi cidi dyumvwija dyà Maatàayi Munsantu 24.28: “Bwalu mwaba wikalà mubidi, ki wàdisangishilà mikanku”?**

Nudi bavùlùke nè mèmè mwà mucyumvwije anyi? Nwamònu anyi? Nkààdi mwandàmùne alu. Pàmwàpa ndi muyjikijè. Mukalenge àtùmbishiibwè!

**Ncikondo—ncikondo bwà Mukàji-musèla nè cyà kwikala nè—kwikala neebè bwà** (Mpindyewu, nkààdi mwandàmùne alu.) **Dyambwibwa?**

Pàmwàpa ndi . . . Kàbìdì ndi mumanyè nè ndi nè nkààdi mwandàmùne alu, bwalu lùvwa lwenjùibwe cimanyinu kwishì; ndi muvùlùke cyôci aci. Èè, Mukalenge àtumbè! Tukàadi twenda tupweka mpindyewu. Tùmonèbi.

**412. Piikalàbi nè Byenzedi 2.38 ke mùshindù wùmwpèlè wà kubàtijiibwa, udi wamba bìshi bwà musumbà wà bantu awu . . . ?** Nkààdi mwandàmùne alu.

<sup>124</sup> Kacya kabàvwa bamanyè cyôci aci mu matùkù àbò to; cidi cifùma ku dibuuludiibwa mpindyewu. Paanyimà pàà wèwè mumanè kumanya cyà dyenza: “Kùdì ewu udi mumanyè mwà kwenza cidi cijaalàme nè kàyi ùcyenza to, bwèndè yèye mmpèkaatù.”

**413. Mwanètù Branham, mbibi bwà kudima—bwà kudima nè kukwàta mudimu mu mfwankà anyi?** Ncyèna ngèèla meeji nè nkààdi mwandàmùne alu to.

<sup>125</sup> Mpindyewu, ndi mbèngangana nè mfwankà. Ndi mbèngangana nè kunwà kwà mfwankà; mwena Kilistò yònsò mulediibwe cyàkàbìdì ewu neikalè mubèngàngàne nendè; kwàjiki, bwalu mmubi. Tudi bamanyè nè nànsha beena maalù

à mamanya à baamingàngà bàdi bamba nè cyôci aci ke cidi cît-wàdija cibûngi cyà kansère kàà pa diminu nè kàà ku bisùlusulu, cidi—cidi mmfwankà. Bàdi bamba nè: “Nwàyì mfwankà wudi mutaata.”

<sup>126</sup> Mpindyewu, nwênù balùme nè bakàji bàdi bânwa mfwankà, aci's cidi ànu cìnuseeswisha, bwalu wêwè kwênà mwà... Èè, cintu cimwèpelè cidibo bènza... Paùdì usùmba mfwankà mitaata, udi nè cyà kuyisùmba yàbûngi, bwalu yidi ànu yìpicisha byà pa lukàmà kampàndà byà mwìshì. Bwalu muntu kanà yònsò neàkwambilè... .

<sup>127</sup> Mvwa mûmvwe muyiiki mu Cisalu cinène cyà cinsangàngàngà cyà Buloba bujimà mu Washington cidimu cishààle (pâmvwà mupâtùke muyè mu Cisalu cinène cyà cinsangàngàngà cyà Buloba bujimà), nè bóbò bangàngàbukà bàvwà bafùme pa buloba bujimà è kucyûmvwijabò; bamba nè kwèna mwà kupeta mwìshì kùyi nè kaabùdìmbù to, nè kwèna mwà... Nènku wêwè nè mwìshì udi nè kaabùdìmbù. Nè kwambabò nè: “Kanùlekedì muntu nànsha umwe ùnùshima bwà bwalu bwà mfwankà mitaata to, bwalu mwaba wùdi unwà mfwankà ewu anyì mukwàbò wùdi mufwànyine kusànkisha dijinga dyùdì naadì bwà mfwankà adi, neùnwe yibìdì anyì yisàtù yà mukwàbò awu.” Cidi anù ci—cintu cyà kudìngakaja naaci bantu, cintu cyà kudìngakaja naaci bantu ku tudyòmbà nè ku ntèlèviziyò.

<sup>128</sup> Kàdi bwà dikwàtà dyà mudimu mu mfwankà anyì kudima mfwakà, mpindyewu, nwênù bânà bèètù bàà ku Kentucky bàdi bàdima mfwankà ewu abu, èè, lekèlaayi ngàmbèku cintu cimwèpelè: Cyôci cikupiiisha paùdì ucyènza, kùcyenji to, bwalu ncyènà mufwànyine kwanyisha bwà kwenza cintu kampàndà cidi cifwànyine... cindì mumanyè nè civwa cìtwàla muntu kampàndà mukwàbò ku lufù lwèndè nànsha. Mbibi bwà kupèèsha mutumba neebè maalà makolè, dîbà adi bìdì mwà kwikala bibi bwà kwenga maalà makolè. Kàdi lekèlaayi ngambè cikwàbò cintu mpindyewu. Mpindyewu, bwà pa bìdì bitàngila kumudima... .

<sup>129</sup> Mfwankà, nudi bamanyè's, bulungù bàdi bàkwàta naabù mudimu kàbìdì mu myandà yà baamingàngà. Kàdi nuvwakù bamanyè nè nutu nudima matalà àsòmbèlâbo bènga naawù wiskí, blè nè orge bitu byènza wiskí anyi? Ncyà bushùwà anyi? Eyo. Nwamònu anyi? Kwèna mumanyè ciikalâbo mwà kukwàta naaci mudimu to.

<sup>130</sup> Kàdi mpindyewu, tudi tudima matalà, mu mùshindù wà nè tudi twela meeji nè patùdì tudima matalà, bwà ààmòna mwà kwenza bukula bwà matalà, nè cyàkudyà bwà bantu, dyâmpà dyà matalà, nè bikwàbò; kàdi bàdi bènza kàbìdì maalà àdì àkwàta bantu nè ôwò awu (nwamònu anyi?), pa nànkù kwèna mufwànyine kumanya cyà dyenza to.

<sup>131</sup> Nènku wêwè udi udima . . . Udi nè budimi bwà mbata. Udi mumanyè cidìbo bènza nè mbata anyi? Bàdi bàpàtulamù opium. Nudi bamanyè cidìbo bènza nè laitue anyi? Bàdi bènza nendè cintu cimwècimwè aci. Opium ùdi kàbidì ùsanganyibwa mu laitue. Nukàdiku kacya badyè ndambù wa laitue nè bamòne mùshindù unùdi nudyumvwa bìmpè bwà katanci kakesè anyi? Ng'opium udi munda mwèndè amu. Nutuku bamanyè nè ùdi kàbidì mu màtùngulu anyi? Cyà bushùwà. Pa nàнку, nudi—nudi numòna's, mbilondèshile ku cyùdi ubyenzele.

<sup>132</sup> Kàdi lekèlà ngámbe nùнку, bu mwanèètù mwena Kilistò kùdi mwanèètù mwena Kilistò: Wèwè mwikàle nè budimi bwà mfwankà, bùsùmbishe kùdi muntu mukwàbò, kùna matalà. Ndi ngèèla meeji nè mbifwànyine kwikala bitàmbe bwìmpè (nwamònu anyi?), bwalu kakùyì mpatà to ke cidìbo bà mudimina . . .

**Bàyaanyì ùvwa musèle kanwàyì wa maalà à kapyà nè ngèndààmàsàndì . . .**

Nkààdi mwandàmùne alu. Lufùmìne kùdi . . . Mvwa munwàmbile mwaba ùvwàlu lufùmìne. Ndwa kule nè mùnwemu. Nkààdi mwandàmùne lukonku alu. Nènku mpindyewu, tùmonèbi.

**Mukàji wa mu Bwàkabuulwibwà 12 awu . . .**

Nkààdi mwandàmùne alu. Èyowà, nkààdi mwandàmùne mushikì wà nkonko ewu. Tùmonèbi. Aci cyàyìjikijì; ndi muyandàmùne. Lùdi pa Bwàkabuulwibwà 12, cìvwàye aci. Tùmonèbi.

**414. Mwanèètù Branham, tudi nè bânà bàbidì bàdi bàya mu èkèleezìyà udi ulombodiibwa kùdi muyiishi mukàji. Tudi bamanyè nè yèyè udi kule nè Dìyì. Bânà bèètù balela bàdi mu bwenzeji bukòlè ebu. Mmùshindù kaayi utùdi mwà kubàmbila nè eci ntùpakànyì's?**

<sup>133</sup> Mvwa munwambile kumpàlà. Mvwa mulwandàmùne. Nènku angàtaayi bwalu abu nè kalòlo kònsò. Ncinyì cinùdi bafwànyine kwamba bu mémè . . . Ndi mumanyè nè muntu awu mmusòmbe kaaba aka. Cyùdi wamba ncinyì bu mémè mwà kwitabuuja nè ndi mumanyè nè mukàji awu nganyì nè ndi mwà kukwambila?

**415. Bukalenge bwà bidimu cinunu nebwikalè bidimu cinunu peeshi ànu cipòòlò cyà cikondo anyi?**

<sup>134</sup> Nkààdi mwandàmùne alu nànsha nè mu dindà emu mene. Nwamònu anyi? Mbidimu cinunu. Èyo.

**Mwanèètù Branham, nshinga wa cìdì . . .**

Èyowà, nkààdi mwandàmùne alu. Blé nè lupèlà, nudi bavùlùke nè tuvwa bandàmùne alu's.

Ndi ngèèla meeji nè tudi twenda tupweka mpindyewu. Mvwa mwà kwikala mupingàja mushikì wà yòyì eyi paanyimà. Tùmonèbi tùng. Cintu cimwècimwè aci.

Mwanèètù Branham, mèmè ndi maamù wa bâna bàsambòmbò balenga bàà dikèma kàdi bàyaanyi mmuswè bwà mèmè kwenza mudimu bwà kwambulwishakù ku lupetu. Bivwa bikèngela bwà mèmè kwènza mudimu anyi? Ndi kàbidì muswè kulòmba Nzambì bwà àmpèèshèku diitabuuja dyà...bwà àmpèèshèku...Abraham nè— nè...bu mùdi diitabuuja...bu mùvwà Abraham nè Danyèlè nè bàna bàà beena Ebèlù abu. Bivwa bikèngela bwà mwena Kilistò kudimayè mfwankà anyi? Nkaadi mwandàmùne alu. Nènku. . .

**416. Mwanèètù Branham, mbibì bwà muntu mukàjì kudikungulayè bòyà bwà ku mikòlò yèndè anyi?**

<sup>135</sup> Ndi mmòna bintu anyi? Aci cidi cyàmba nànkù anyi? Ncyèna mwà. . . Ncyèna mumanyè to. Abu bwalu nènkukekèlèbù.

**Mbi—mbibì ditùkù edi bwà kucincika dìkù dyèbè anyi? Cìvwa cyùmvwija kutèeka mu cyenzi dikòntonona dyà lulèlu mu kaabujimà anyi?**

<sup>136</sup> Mvwa mwandàmùne lwòlù alu, mu bushùwà bwà bwalu, kùdi. . . muntu nè muntu pàà nkààyèndè. Tùmonèbì's.

**Mukàjì uvwa mu mpèkaatù yèyè mushipè dibàkà nè musèlùdìibwe nè. . .**

<sup>137</sup> Mvwa mwandàmùne lwòlù alu. Nudi bavùlùke nè ngàkamba nè: “Lekèlaayi bwalu bwà dishipa dyà dibàkà too nè. . .”

**417. Ndi nè mulunda ùndì munangè bikolè be. Ùvwa mupetè yimwè mikàbà yà mèyì nè mikàndà mimufùndila yìndì ngiitabuuja nè yidi nè. . .kacya ncitukù mwakùle nendè nànsha. Cyà bushùwà, ngèèla meeji nè ndi ncìina bwà kumubùtula nè kumujìmija mu bulundà. Bìvwa bikèngela bwà mèmè kwenza cinyi?**

<sup>138</sup> Akulà nendè mu dinanga. Ncyèna. . . Ngèèla meeji nè ndi mwandàmùne aci, kàdi ndi—ndi mufwànyine. . . Kùteecikù—kùteecikù bwà kwitabishisha muntu nànsha umwe cintu to. Ikàlà ànu mutwe mukèlè; nebàjinge bwà kwikala bu wèwè.

Mwanèètù wa balùme, mwanèètù wa bakàjì, ngèèla meeji nè nkàadi mwandàmùne yòyi eyi.

**Mwanèètù Branham, bwà luse swàkù ùmvwijèku bwalu bwà baavirgò bàtaanu bakùtākàne abu.**

Ndi—ndi mumanyè nè nkàadi mwandàmùne alu. Ndufùnda, kàbidì ndibèji dikúnze. Ngèèla meeji nè tudi. . . Nkàadi mwandàmùne lwòlù alu. Ngèèla meeji nè ndi mwandàmùne yònsò eyi. Mukalenge àtumbè. Tùmonèbì. Mfwilaayikù luse bwà katanci kakesè cyanààna.

**418. Mupròfètà munanga wa Nzambì, Maakò Munsantu 16.18, Ndi. . .citupà cyà kutentekela babèedi byanza. . . Ndi**

**musòmbè pabwìpi nè bakwàci bàà nyòka nè byanza. Bwalu abu bìdi bishi?**

<sup>139</sup> Èè, alu's ndukonko lwîmpè. Wêwè usanganyiiibwa pabwìpi nè bakwàci bàà nyòka nè byanza, nè bàmba nè Maako 16... Cyà bushùwà! Mémè ndi ngiitabuujà nè Bible ùdi ùmvwija ànu cidiYe wàmba aci. Ndi ngèèla meeji nè twètù bateetè kuteeta Nzambi mu cintu kampàndà, tudi tusuna tudyàmbika. Kàdi ncyènà ngèèla meeji nè Nzambi mmuswè kwamba nè ùntwàdilè mùlàngì wà mulùngù mukolè bwà kumòna ní ndi mwà kuwùnwa nè kukujaadikila nè ndi nè diitabuujà to; ànu mùndi nciyi ngiitabuujà nè mbifwànyine kwikala bìmpè bwà nwènù kuntwàdila nyòka, bwà mémè kumukwàta, bwà kunùleeja nè ndi nè diitabuujà dyà nè ndi mwà kucimuna lulengu lwèndè alu to. Ncyènà ngèèla meeji nè bìdi nàнку to.

<sup>140</sup> Ndi cyà bushùwà ngiitabuujà nè bu mémè mwà kwikala mu màyi munkaci mwà kubàtiiza bantu, anyi ngènza mudimu wà Mukalenge, anyi mwitu mu bisuku amu, kàdi nyòka kunsùmàyè, ndi mufwànyine kutùngunuka buludìnè kwenda mu Dìna dyà Mukalenge. Nwamònu anyi? Mémè ndi ngiitabuujà nè ke cìvwàci cìswa kwamba.

<sup>141</sup> Mpindyewu, byòbì bikèngela bwà wêwè kwangata... Nwamònu's, cyùdi wenza nè cyòci aci, mukwètù munanga nànsha wêwè mwikàle nganyi—nànsha wêwè mwikàle nganyi... Vùlukàayi eci. Nwamònu anyi? Tàngilàayi nùmone cidi Bible mwenzè pa bwalu abu. Ànu mùdìbì nè ndi ngiitabuujà nè wêwè uteeta bwà kwamba nè: “Butùmbi, butùmbi, butùmbi...” Kuteeci Nzambi bwà kwakula mu myakulu to, wêwè lekela ànu Nyumà àkwilè mu wêwè amu. Nwamònu anyi?

<sup>142</sup> Mpindyewu, mémè ncyènà ngiitabuujà diteeta dyà Nzambi anyi kusàka kwà cintu kanà cyònsò ku makàndà nànsha. Ànu mùmvwà mwambè katanci aka, pàvwà Nyumà... Tudi twindila Nyumà; Yèyè ngudi ucyènza.

<sup>143</sup> Mpindyewu tàngilàayi, Pòlò ùvwà wàngula tukùnyi mu cisanga cyà Crete, ngèèla meeji nè mùvwà mmwòmò amu. Kàbìdi yèyè ùvwà usanganyiiibwa ku nkànu, ke nyòka, pàmwàpa nyòka wa ntòòkà wa diitu... Aci's ndusùmù lwà lufu; ùvwà nè cyà kwikala mudishinde panshi nè lùkàsà lwònsò, mufwè. Ncyènà mumanyè nyòka mukwàbò nànsha umwe udi mufwànyine kukushipa nè lùkàsà lwònsò nàнку to, piikalàye kàyi nyòka wa ntòòkà wa diitu nànsha.

<sup>144</sup> Pa nàнку wàkambula nyòka wa ntòòkà wa diitu ewu, mutùdi mwà kwamba. Ndusùmù lwà lufu; ciikalè cikushàadile wêwè, ànu myeyelu mikesè mishààle. Nyòka wa ntòòkà wa diitu yèyè mukusùme, anyi, nyòka wa mpyàpijà, udi nè byà pa lukàmà makùmi àtaanu byà kushààla nè mwoyi, byà bàkwela màyi, bwà wêwè kwikala nè mwoyi, bwà nyòka wa mpyapija mufilke

awu. Bwà nyòka wa kàlaabi wa mpyàpijà awu udi nè byà pa lukàmà makùmi mwandamukùlù bwà wèwè kufwà nè byà pa lukàmà biipacila ku makùmi àbìdì bwà kushààla nè mwoyi; bwà nyòka wa ntòòkà wa diitu yèyè, kwèna nè mpùngà to. Udi wèwè ànu mufwè, kwàjikì, bwalu udi weyela ànu ndambù mukèsè wa mweyelu. Lùdi lùtekesha ndongolwelu wa mijilujilu awu, ndongolwelu wa mashi, nè bikwàbò byònsò, nè wèwè muyè. Nwamònu anyi?

<sup>145</sup> Kàdi pàdì—pàdì nyòka wa ntòòkà ewu wàkasùma Pòlò ku cyanza cyèndè, bààkamba nè: “Èè, muntu awu ùdi. . . Yèyè’s mmuntu mwena lwonji, pàmwàpa mmushebeyanganyi. Nànsha mwàkapàndukàye ku mbù amu, nànsha mùdìbì nè. . . yèyè kì mmufwànyìne kupànduka ku lufù to. Tunzambì netùmushebèyè bu—bu mùdiye mushebeyanganyi.”

<sup>146</sup> Pòlò wàkatàngila, nè nyòka ewu mumulembèlèle ku cyanza, yèyè kumunyùkusha ànu cyanàànà, kàyì musalùkekù to, “Kaa, Mukalenge, nkwaçishèku bwà mèmè kucyènta.” To! Wàkamutàngila, è kumukùpayè mu kapyà, è kutùngunukayè nè kwenda kwangula tukùnyi byenzè bu nè kakùvwa cintu cyenzèke nànsha.

Kwambabò nè: “Yèyè’s neàfwe ànu mu katanci kakesè emu, bwalu pàdì nyòka awu ùkusùma, kwèbè nkujike.” Paanyimà pàà katanci cikondo è kupitaci, Pòlò kàkuulakana, kufwà, anyi kuumvwa ncintu kampàndà to. Bòbò kwamba. . . Bòbò kushintulula, kwambabò nè: “Yèyè’s n’nzambì udi mutùlùke mu mmwènekèlu wa muntu.” Nwamònu anyi?

<sup>147</sup> Yèyè kàakambakù nè: “Ntwàdilaayi nyòka awu” to, kàdi nyòka nguwà mumusùme. Kacya Yèyè kàakateetakù Nzambì to, kàdi ùvwa nè diitabuuja kùdì Nzambì bwà kucimuna lusùmù lwà nyòka awu alu. Nudi numòna cìndì muswè kwamba aci anyi?

<sup>148</sup> Pa nànkù nànsha wèwè mwikàle nganyì udi munkaci mwà bakwàci bàà nyòka nè byanza awu, mèmè. . . Mpindyewu, bòbò baswè kukwàta nyòka nè byanza, aci—aci ncibàtàngile. Nwamònu anyi? Ncyèna ànu ncimòna mu mùshindù awu to.

<sup>149</sup> Mpindyewu, wèwè udi wamba nè: “Èè, bantu abu’s bàdì nè diitabuuja.” Ncyèna ngàmba nè kabèna nè diitabuuja to, bàdì bàdyòsha nkààyabò nè mudilu wa acetylène nè bintu byà mùshindù awu abu, kàdi (nudi numòna anyi?) aci kacyèna ànu cijaadika Nzambì to.

<sup>150</sup> Nkààdiku mumòne ba-Indiens bèndela—pa mushikì wà mudilu, wa màkàsà àsàtù mu bucyàmà wa bule bwà metèlè makùmi àsàtù nè àsambòmbò, pàvwàbò bàwùpudija nè mabèji too nè mùvwàwu ùkenka nkènkenkè (kabàvwa bantu bàà pabwàbò to, ànu baabidimè bèètù aba), bavùula bisàbaatà byàbò, bàngata ndambù (baakwidi bàbàbènesha nè mashi à mbuji), nè bàngata tulonda tukèsè bu mùdì ndòbo amu, bàtùpàyika mu dikòbà dyàbò pamutù pàà mishikù yàbò apu,

too nè mùvwàbo bàshààla babi nè mabùlu—à màyi, mûle bu tubùlu tukesè twà mucì wà Noël mùshindù ewu, bilengejilu, byùle tètè, nè ndòbo minène buleyi mikwàte mu misunya yàbò (nudi mwà kudifwànyikijila mùdìbo bàdibwejayi nè bàyìpàtula's), nè bàshààla biimàne mùshindù awu, nè bèndèla mu kapyà kàvwà kàlàkuka aku bènda bàkàsambuka (kàà bwalu—kàà bwàlu kàvwa kàkenka nkènkènkè, kapite nè pa dikùnta, kandàmùke katòòke)—bènda bàbàndà bàpwèka mu kapyà amu bànyùnguluka bàtwa kumpàlà bàtwa paanyimà, kabàyiku nànsha nè kaadibuba pa makàsà àbò. Biinè abu kabèèna nànsha biitabuuja Nzambi wètù twètù ewu nànsha. Bàdi bakuukwila, dikuukwila dyà démon. Nwamònu anyi? Pa nàntu aci kacýèna nè cidici cyùmvwija to. Shààla wèwè ànu kule. . . Wèwè ikàlà ànu mwena Kilistò mulelèlè, wa kalolo, mudìpwèkèshe, kwikala ànu nè nsòmbelu awu, nènku dîbà adi Nzambi neàtangilè bìdì bishààla abi.

**419. Mwanèètù Branham, ncinyi cyàyiisha bayiishi abu—cyàyiishàbò bàdi kabàyi bàya mu Mukàji-musèla? Mukenji wàbò mpindyewu, Nyumà Mwimpè, dibàtiiza dyà mu màyi, nè lupàndù, cyàyiishàbò ncinyi pùikalàbo kabàyi bàya mu Mukàji-musèla awu?**

<sup>151</sup> Èè, nebiikalè. . . Nudi bamanyè ciikalà pàmwàpa mwà kwenzeka anyi? Ndi ngàmba nùntu, mpindyewu. Ncyèna mwà kujaadika eci to, kàdi ndi. . . Bòbò nebàtungunukè ànu nè kuyiisha ànu mùdìbo bènta mpindyewu emu, nè bantu bàtungunuka nè kwela meeji nè bàdi bènda bàsùngidiibwa; kàdi Mukàji-musèla neikalè mumanè kuya.

**420. Mbimpè, bilondèshile Dîyi bwà kwenza dikòntonona dyà kulela anyi?**

<sup>152</sup> Mvwa munwàmbile nè nengàdamunè alu pàà nkààyetù. Nwènù bàdi nè nkonko eyi abu, lwàyi kùndi pàà nkààyeenù.

**Mwanèètù Branham munanga, tudi nè mulongeshi ùdi mumanýè nè Mifundu yidi yàmba. . .**

Èyowà, nkàadi mwandàmùne alu. Indilà kakesè mpindyewu.

**Mwanèètù Branham, musangu kampàndà tuvwa nè dìnà dyètù difùnda mu mukàndà wà mùshindù kampàndà. . .**

Èyowà, nkàadi mulwandàmùne. Lùdi lùtàngila mwàkadìbo badyùmùshamu mpindyewu, bàvwa benzè bibi anyi?

**421. Bishi. . . Udi mufwànyine kwitaba dikòntonona dyà kulela anyi?**

<sup>153</sup> To, ncyèna mwà kuciitaba to. To, mukalenge. Nwamònu anyi?

**422. Cidi. . . Mwanjèlò wa mwandamutekète, bu mùdìbo baakùle bwèndè, wa mu Bwàkabuulwibwà 10, mmuntu ànu umweumwe nè Eliyà wa Maalàki 4 awu anyi?**

Mvwa mwandàmùne lwólù alu anyi? Lùdì lùmwèka bu nè ncyèna mulwandàmùne to.

<sup>154</sup> Èyowà's, mmuntu ànu yèyè umweumwe awu. Bwàkabuulwibwà 10 m'Mukenji wa mwanjèlò wa mwandamutekète, udi...mwanjèlò mùsànjeelà wa mwandamutekète wa Cikondo cyà Mwandamutekète cyà Èkèleeziyà, udi mwikàle Maalàki 4.

### Dikòntonona dyà kulela . . .

<sup>155</sup> Ndi naayi yàbúngì pa bwalu abu. Ndi ànu muyitùme yòyi eyi paanyimà, nènku ncivwa—ncivwa muswè kwandamuna to; ndi ntamba kujinga kumòngana nèbèbè pàà nkààyeetù.

**423. Mpenyi patùdi tusangana mwaba wàkayiishà Noà munda mwà bidimu lukàmà nè makumi àbidi awu nè wàkiibaka bwàtù abu munda mwà bidimu lukàmà nè makumi àbidi?**

Ndi mwandàmùne alu anyi?

<sup>156</sup> Lukòngò kampàndà, anyi cikondo kampàndà cikòsa, cikondo cikòsela muntu pa buloba civwa bidimu lukàmà nè makumi àbidi, cyàkangata Noà, cipungu aci, bwà kwibaka bwàtù, civwà cibadiibwà bu lukòngò mu dyòdi ditùkù adi. Bidimu lukàmà nè makumi àbidi ke cikondo civwà cikòsela muntu. Nènku yèyè wàkayiisha, bilondèshile . . . Genèsè 6.3, wàkayiisha lukòngò alu, lùvwà bidimu lukàmà makumi àbidi; byàkenzà Noà. Èyo. Tùmonèbi mpindyewu's.

**424. Mu Maalàki 4, Eliyà ewu ùdi nè cyà kufikisha myoyi yà baataatù kùdi bânà, nè pashùshe myoyi yà bânà kùdi baataatù. Nyèyè muntu umweumwe ewu anyi?**

<sup>157</sup> Èyowà's, muntu umweumwe awu. Èyo. Kaa, anji indilà kakesè. To! Mfwilaayikù luse, mfwilaayikù luse. Ànu . . . Nudi numòna mùdi Nyumà Mwimpè ùbàkula aci bwànyì mèmè dìbà adi anyi? To! Mèmè kudyàmbidila nè ncyambè nè . . . Nwamònu anyi?

<sup>158</sup> Civwàku mu Maalàki 3 aci, mwaba awu nè: “Ndi ntùma mùsànjeelà Wanyi kumpàlà Kwànyì,” uvwa Eliyà awu. Mu Maalàki 4 ùdi wàlukila nè wàmba nè: “Mònaayi Ndi ntùma Eliyà.” Maalàki 3, bivwa bikèngela kwangataYè mùsànjeelà mutùmiibwe kumpàlà kwà mpàlà wa Mukalenge Yesù, uvwa Yone awu. Mbanganyi bàdi bùmvwà cyòci aci? Maalàki 4, pààlwà Eliyà ewu, dyàkàmwè paanyimà pàà Mukenji wèndè nè bikwàbò, nè paanyimà, n'Dilwa dyà Mukalenge nè divwijulula dyà buloba bupyabùpyà.

<sup>159</sup> Nènku nudi numòna's, bwà kucivwija cilelèlè mpindyewu nè kacyèna . . . Mùshindù mwinè wàkafundà Nyumà Mwimpè kùdi mupròfeta ewu's, Yèyè nè: “Neàpingajè myoyi yà baataatù, dyàmbedi, kùdi bânà.” Nwamònu anyi? Aci civwa dilwà dyàkumpàlà dyà Yone. Wàkapingaja myoyi yà baataatù, bàà kale abu, baataatù bankambwà abu, ku Mukenji wà bânà, civwà

lukòngò lupyalùpyà díbà adi, Yesù, mu lukòngò alu. Pashiishe nè, mutwàngaji, ùdi ùlamakaja pàmwè “kupingaja myoyi ya bânà kùdì baataatù,” ciikàlè cyùmvwija nè, Mukenji wa leelù ewu newùpingajè myoyi yà bânà mu cikondo cyà èkèleeziyà kubààluja ku diitabuuja dyà ku cibangidilu dyà Mpenta dyà ku cibangidilu adi.

<sup>160</sup> Pa nàнку nebiikalè bantu bàbìdì bashiilàngàne... Mùsànjeelà umwèpelè awu, kàdi cidi citàpulula kwàka dilwa dyà—dyà kumpalà nè diibìdì, dyà Yone... anyi mùsànjeelà awu, Eliyà.

**Bàyaanyì nè mwanàanyì wa balùme mutekète kabèèna biitabuuja...**

Èyo, ndi mwandàmùne alu. Ndi mumanyè nè mvwa mulwandàmùne, bwalu ndi mumanyè nè bantu bàdì nè mènà àbò mafùndapò. Ndi mvùluka múmvwà ngàakula naabò paanyimà bwà bwalu abu.

**425. Mmunyì mutùdiku mwà kujandula diswa dyà Mukalenge? Dikù dyètù—dyètù bwà... Bivwà bikèngela bwà twètù kuya nè lubànzà lwètù ku Jeffersonville, mu Indiana anyì? Muntu ùdi mwà kwikala mwena Kilistò kàdi kukìna bantu bafiike anyì? Nzambi kí mmuswè bwà kubadiibwabo bu twètù, bwalu bàdì nè dikòbà difiike anyì? Udikù mwà...? Cyùdì utùbela bwà kwenza mu bwalu ebu ncinyì? Udi witabuuja maalu à diitabangana anyì disungulujangana anyì?**

<sup>161</sup> Ndi ngiitabuuja diitabangana. Ndi ngiitabuuja nè muntu... Nànsha diikala dyà dikòbà dyèndè diikàlè cinyì anyì yèyè mwinè mwikàlè nganyì, yèyè mmuntu ànu bu mùndì emu. Acì's mmwòmò menemene. Nènku ndi ngèèla meeji nè, bu bóbò ànu mwà kulekela bantu bafiike abu kwàbò kwà tálàlàà, nè ba-communistes abu kabàyikù bayè kuntwaku nè babàsonsole...

<sup>162</sup> Mpindyewu, bàvwa baswè... Mpindyewu, bantu bàà bafiike bashùwashùwâlè, kùdì musùmbà mushùwashùwâlè wà bantu balediibwa cyàkàbìdì, bansantu bàà difwàna dyà Nzambi munkaci mwà bóbò bantu abu. Èyowa's, ncyà bushùwà. Ànu bwalu dikòbà dyànyì nditòoke nè dyàbò bóbò difiike, aci kacýèna nè cidìci cyùmvwija bwànyì mèmè to. Yèyè mmwanèètù piikalàye mu Kilistò.

<sup>163</sup> Ke bwà cinyì ndi mushiilàngàne nè diyiiisha dyà cyena Afrikaans adi; kabàvwa nànsha biitabuuja nè bantu abu bàvwa nè musùkà to. Ke cyàkamfikisha ku dikinyiibwa kuntwaku. Mèmè nè: “Muntu awu's ùdi ànu bu mùndì mèmè emu. Yèyè ùdi nè bukenji bwà kwikala nè dyèsè dimwèdimwè dindì naadi edi. Dikòbà dyèndè kadyèna nè cidìdi dìshintulula bwànyì mèmè to, anyì muntu mukwàbò kanà yònsò udi mulediibwe cyàkàbìdì kùdì Nyumà wa Nzambi ewu.”

164 Kàdi mêmè kwamba nè: “Bu bôbò ànu mwà kulekela bantu bafiike abu kwàbò kwà tálàlàà, nùnkù kabàvwa mwà kwikala basonsòdiibwe bwà kwenza cintu aci to.” Nènku nèncyàmbìdilé ku cyambilu eku . . . Tudi nè bantu bafiike bààbúngì bàtù bàlwa kaaba aka. (Ncyèna ngèèla meeji nè kùdikù nànsha nè umwe kaaba aka dilòòlò edi to.) Kàdi tudi nè bantu bafiike bààbúngì bàdi bàlwa mu èkèleeziyà emu. Mwanèètù wa balùme, bàdi baakidila bilenga ànu mùdi muntu mukwàbò kanà yònsò ewu emu. Mmwanèètù wa balùme nè mwanèètù wa bakàji.

165 Nè bàmwè bàà ku bantu bàà maalu mímpè matàmbe bànkadiku mutwilàngàne naabò kacya bàndela mbàmwè bàà ku bantu bafiike abu. Pashìshe kùdi bàmwè bàà ku bôbò bàdi bapidyè diitabuuja, byà mwomùmwe nè bantu batòòke, anyi bantu bàà kalaabi, anyi bantu bafiikùlùke. Èyowà's, ncyà bushùwà.

166 Mpindyewu, mêmè ncitu muswè mabàkà masopakaja to. Ndi ngiitabuuja nè kabivwa bikèngela bwà muntu mutòòke kusèlayè nsongàakàji wa bafiike to, anyi nsongàakàji wa bafiike kusèdiibwayè kùdi muntu mutòòke to, anyi wa kalaabi kusèlayè wa bafiike to, anyi mutòòke, anyi wa . . . Ndi ngiitabuuja nè muntu mufikùlùke, mufiike, mutòòke, nè bisà byà bantu bidi bu mùdi budimi bwà bilòngò bwà Nzambi amu, nè ncyèna ngèèla meeji nè bivwa bikèngela bwà kwikalabò basopàkàjiibwe to. Ndi ngiitabuuja nè mùshindù awu ngùdi Nzambi mubènzè, nè ndi ngiitabuuja nè mùshindù awu ngùvwàbi bikèngela bwà kushàalabò.

167 Ncinyi . . . Cidi cìmpicila pa kumòna nsongàakàji kampàndà wa bafiike mulenga kumòna, wa meeji, mwànà wa mmwènekelu mulenga, mulenga ànu mùdi mukàji kanà yònsò ewu ùdiku mwà kujinga bwà kumòna . . . Bwà cinyi ùdikù bwà kujinga bwà kusèdiibwa kùdi mulùme mutòòke bwà kulelabò bàna bàà mùlàtrèzè? Cidi mukàji wa bafiike wa lungènyi lutwè mwà kujinga kwenzela cintu cyà mùshindù awu ncinyi's? Mbwalu cintu kampàndà . . . ncyà ba-communistes . . . Kàdi mmunyi mùdiku muntu wa—wa maalu malenga . . . wa—wa—wa bafiike mufwànyine kujinga bwà kusèla mukàji mutòòke nè kulela bàna bàà mùlàtrèzè?

168 Ncyèna ngiitabuuja nè ndi . . . Ndi ngiitabuuja nè bivwa bikèngela bwà nwènù kushàala ànu citùdi eci. Tudi—tudi basadidi bàà Kilistò. Nènku Nzambi kungenza . . . Bu Yèyè mungenzè, dikòbà dyànyì difiike, mvwa mufwànyine kwikala nè disànkà dyà kwikala muntu mufiike bwà Nzambi. Bu Yèyè mungenzè muntu wa kàlaabi, mvwa mufwànyine kwikala muntu wa kàlaabi wa disànkà bwà Kilistò. Bu Yèyè mungenzè mutòòke, mvwa mufwànyine . . . ? . . . muntu mutòòkè wa disànkà bwà Kilistò. Bu Yèyè mungenzè mufikùlùke, anyi mukùnze, Indien, nànsha ciikàle cinyi, mvwa mufwànyine kushàala ànu nè dikòbà

dyànyì dimwèdimwè adi. Awu ùwva mufwànyìne kwikala mèmè. Ndi muswè kwikala mùdi Mufwìmbi wanyì mungènzè.

169 Kuntwaku ditùkù adi mu Shreveport pàakajuuka dibinduluka adi, nènku bôbò...nè kùwva bansongàalùmè bônso bàà bafìke abu basonsòdìbwe kuntu kwàka abu, cyà bàà communistes . . .

170 Ngǎnwǎmbìdi mu cyambilu eci emu nè, Martin Luther King ke dibànzà ditámbe bunène ditù kacya bantu bafìke bapetè. Ncyà bushùwà. Muntu awu nealombole binunu nè binunu byà bantu ku cishipeelu (ncyà bushùwà), musonsola kùdi communisme.

171 Lekèlaayi njaadikè kaabwalu kàànyì aka. Mwva mwambe cyôci aci kùkaadi bu bidimu bibidi. Tàngilàayi nùmonè cidi munkaci mwà kwenzeka mpindyewu mene. Bàkamba nè bàvwà bàlwangana bwà diitabangana, kàdi pàakabàpèsha mukenji diitabangana . . .Nè kunùdi nwènù bantu bàdi kanùyì nwitabuuja diitabangana, bundù bwènù. Ditungà dyètù didi diitaba diitabangana, nènku bìvwà bìkèngela bwà twètù kwenza cidi mfùmù munène wa mudimu wamba bwà kwenza aci. Aci's ncyôci menemene.

Nènku mpindyewu, udi wamba nè . . .Kùyì ulwa mu myaba, nè bikwàbò byà mùshindù awu, anyì kusumba bintu, anyì kusomba mu ndekeelu mwà bisè mwàmwa, nè bikwàbò, to, mukalenge! Mikenji yìdi yàmba nè bàdi ànu mwomùmwe nè twètù, pa nàнку tudì mwomùmwe nè mùdìbò amu; pa nàнку twènzàayi mùshindù awu. Twikalàayi mùshindù awu. Nènku ke cyôci aci menemene cidi bônso bàdi bulelèlà balediibwe cyàkàbìdi abu biitabuuja. Nènku mpindyewu, ndi ngèèla meeji nè aci ke cidi mu myoyi yàbò.

172 Ncítukù kacya mùmvwè njiyà bwà bantu bu yìndi mùmvwè bwà bantu bàà mu Àfrikè, mùshindù wùvwàbo batàcìshìibwe awu to. Nè mèmè ncitu ngiitabuuja bintàkanyì abi to. Mèmè ndi mwena ku sud; ntu mulediibwe dyàmwàmwà dyà musulù, kàdi mèmè ndi bu Abraham Lincoln; ndi mulwè kaaba aka, bwalu ndi ngiitabuuja nè bantu bààkalediibwa biikàle mùmvwè. Ncyà bushùwà. Nè ncyènà ngiitabuuja ditàpulula dyà bantu nànsha nè bintu byà mùshindù awu, pàdi bôbò bantu abu . . .babàtiijiibwe nè Nyumà Mwìmpè nè bikwàbò.

173 Kàdi tàngilàayi, kì mbeena Kilistò balelèlà bashùwashùwàle balediibwe cyàkàbìdi bàà bafìke abu bàdi bàfila lutàtu lwónsò elu to. Nudi baswè kubàpiisha bwà cyôci aci, kàdi bìshi bwà bàmwè bàà ku bânà bèètù balela bàà batòoke bàdi bapidye diitabuuja abu? Nwamònu anyì? Mpindyewu, mùpeyapeyàbò ntàmbà ke mùpeyapeyàbò cyòmbe bwalu mbintu byà makèyikeyi byónsò. Èè, bânà bèètù balela bàà batòoke bàdi bàlela ndululu misangu yìbìdi kutàmba mùdìbò bènza. Mmwòmò menemene. Cidi penyi? Mu bilongelu byètù nè bintu

byà mùshindù awu. Bàmwè bàà ku bantu bèètù bàdi balongè tùlaasà tutàmbe kutumbuka mbàdi bènza byôbi bintu abi. Nwamònu anyi?

<sup>174</sup> Èè, ncinyi aci? Mpindyewu, bwà kunùleeja nè n'communisme kàdi kí mbantu bàà bafike abu to, mùshindù awu ke wùtù communisme ùlwa misangu yònsò bwà kukwàta ku bukòokeshi bwèndè. Bàdi bènza aci mu ditùnga nè ditùnga dyònsò. Awu ke mùshindù wùdìbo bàcyènza, bànsongakaja nulwanganyishangana mvità muntu nè mukwèndè, dibìnduluka, díbà adi bàdi bàbwela kakùyì cingoma cyabisha to. Kí mbaswè kutaayisha ditùnga edi to; bàdi naadi dijinga. Bàdi mwà kudifindamù. Nènku mpindyewu, mbamòna mpùngà wa kwenzelabò bwalu abu, nè mbamanyè civwà dibìnduluka dyà kale, kàdi kwelabò meeji nè mbafwànyine kutwàdija dibìnduluka dikwàbò.

<sup>175</sup> Bwà kushindika nè mmwènenenu wanyì mmutòòke, paanyimà pàà bóbò bamanè kupeta diitabangana (bàdi naadi patùdi twakulangana apa, byanyisha kùdi mikenji, bilondèshilàngàne nè mikenji), bàdi bàlela lutàtù luvulè mpindyewu kutàmbe mùvwàbo balùlele dyàmbedi amu. Nwamònu anyi? Bidi bileeja nè n'communisme kàdi kí mmisùukà yà mushinga mukolè yìdi milediibwe kùdi Nyumà wa Nzambi ayi nànsha.

**426. Tucidi ànu nè cyà kulàkuka nè lukunukunu bwà kuyiisha Èvànjeeliyò, anyi cikondo cikaadi cimanè kujika?**

<sup>176</sup> To, tùngunukà wèwè ànu nè kuyiisha nè mwèbè mwònsò. Mwanèètù, shààla nendè; mèmè ndi ànu paanyimà pèèbè apu menemene.

**427. Mwanèètù Branham, paùdi wamba cipròfetà bwà: kubènga kudya mayi, kubènga kusòmbela mu cibandabanda, cipròfetà aci civwa ànu bwèbè wèwè anyi bwà disangisha? Eyo.**

<sup>177</sup> Kùkaadi bidimu, bitwè ku makùmi àsàtù, mvwa mufile cipròfetà nè bìvwa nè cyà kwenzeka mu matùkù à ndekeelu nè nekwikalè màsaamà munkaci mwà nyama, munkaci mwà ngombe, nè mayi, too nè ku mayi mene. Bìvwa mwà kwenzeka nè, kùvwa mwà kwikala mayi àvwà kàyi mafwànyine kukùmbana bwà kuàdya to. Kàbìdi, bìvwa mwà kwenzeka nè bantu bàdi basòmbèle mu bibandabanda...Mpindyewu vùlukàayi nè, mvwa mwambè cipròfetà mùshindù awu kùkaadi bidimu makùmi àsàtù, bwà nè nebikenzèkè nè, bantu bàdi basòmbèle mu bibandabanda, bwà nè ndi mwà kulòmba beena Kilistò bwà kumwangalabò mu cibandabanda, nè kabèèna nè cyà kudya. . .Minyìinyi mishiilàngàne nè bintu byà mùshindù awu, mbifwànyine kwikala mulùngù. Mbifwànyine kwikala byà njìwù (Ndi ngèèla meeji nè ke mùshindù wùmvwà mucyàmbè) bwà bantu kwikalabò basòmbèle mu bibandabanda.

178 Mpindyewu, aci cìvwa n'kumpàlà kwà kwikalabò nè bipeta byà nsèsè yà bômbè kumpàlà kwà kumanyabò cintu nànsha cimwè pa bwalu bwà nsèsè yà bômbè. Kàdi awu ùvwa Nyumà Mwímpè munkaci mwà kundimwija. Kàdi mpindyewu mene, nànsha ku ngombe yètù mene (S'nudi bamòne bayumúshe mu bisalu) miikàle mipwidijila nè bwanga bwà Cikupì bubwejè cintu kampàndà munda mwà ngombe.

179 Mònaayi kàbìdì nè, bintu byònsò byà disopakaja dyà mamiinu ebi nè bikwàbò bìdìbo badìtwe mu kwenza ebi kakuyì mpatà to bìdì munkaci mwà kunyanga bukwàbantu. “Byà pa lukàmà makùmi àsàtù,” byà pa lukàmà makùmi àbìdì anyi makùmi àsàtù, mùdì *Reader's Digest* mwambè's, “byà babèèdì bàdì mu lùpitaadi mbakabwejamù ànu bwà bangàngabukà.” Bàdì bàkupèèsha bwanga kampàndà bwà kupàtula dìsaamà kampàndà didì munda mwèbè, kàdi bùshiyamù cintu kampàndà cikwàbò.

180 Kàdi nukààvwakù batàbàlèèle mayi anyi? Cidimu cishààle eci nkàmà yà bantu mu Louisville nè mu Jeffersonville bàvwà bapòne mu kusaamà nè babwejiùbwe mu mpitaadi bwà dilùkà dyà ku mayi àvwàbo badyè à ku nzòlò yà mu cibandabanda emu. . . Mayi àdì mafùmine mu cibandabanda amu àvwa malengiùbwe kùdì nsèsè yà ku bômbè bùvwàbo beelè. Nè dyela dyà mulùngù mu bisuku, nè bikwàbò, bintu byònsò mbitpetè mulùngù.

181 Kàdi's ke mwaba wùdì ucìpetèla ewu, mwanèètù wa balùme. Ndi ngùtabuuja nè mwoyi wànyì wònsò nè ncifùnda mu Mifùndu nè—nè cyàkudyà nànsha cimwè kacìvwa mwà kudìibwa kakuyì disàkidila nànsha, bwalu ncijidiùbwe kùdì Dìyì dyà Nzambi nè disambila. Nwamònu anyi? Wèwè ucìdye, ambà nè: “Mukalenge Yesù, Wèwè udi mundongòlwèle cyàkudyà. Mpindyewu, nè diitabuuja ndi njidila cyàkudyà eci bwà dikàndà dyà mibidi yètù.” Pashiishe ucìdya, bwalu mu cyònsò citùdì twenza nku diitabuuja.

**Mwanèètù Branham munanga, bishìmikidi byà kushipeela dibàkà nè mulùme kanwàyì?**

182 Ncyèna—ncyèna muswè kwakula bwà dishipa dyà dibàkà adi to. Aci—aci. . . Cìdì, nè—nè—nèncyakùlè ndambù kakesè pashiishe.

**428. Mwanèètù Branham, Mwanèètù** (Anjì indilà kakesè. Eci ncitàngìle umwe wa ku bambi bàdì kaaba aka. Swàyì ncìbalèbi dyàmbedi. [Mwanèètù Branham ùdì wikisha nè ùbala lukonko bwà yéyè nkààyendè—Muf.] Hum! Anjì indilà kakesè. Èè, ndi nkwambila. Nèngiikalè mwà kulùbala nànsha bìshi.)—**Mwanèètù Branham, Mwanèètù Neville mmungambìle ku cipròfetà nè EMU MMÙDÌ MUKALENGE WÀMBA** bwà nè mèmè mwva nè cyà kupeta Nyumà Mwímpè. Ùngambila nè ditwishiiibwa edi dyà

**nè ndi mufwànyine kupeta Nyumà Mwímpè, Ncyênàku mwanjì ànu kupeta Nyumà Mwímpè to. Bivwa bikèngela bwà mèmè kutùngunuka . . . ?**

<sup>183</sup> Èyowà's, bushùwà! Enzà nàнку. Tùngunukà wèwè ànu nè kwitabuuja.

Mònaayi's, ndi mbiikila . . . mvwa mwimàne ku luseke lwà Mwanèètù Wood makèlèlèlè awu pàakabwelà dibiikila dyà ku tèlefonè kùdi muntu kampàndà udi mu dikalù dyà balèma, uvwa mulwè mwaba ewu mwikàle nè bujitu ku mwoyi bwà muntu kampàndà uvwa—uvwa kanwàyì nè ùvwa mupìcile mu lùpitaadi lwà Baakanwàyì nè mutwibwemù nshìngi, mu lùpitaadi nè bintu cyakaa; nè Mwanèètù Neville, mwikàle wàkula mu myakulu anyì mùshindù kampàndà ùfila ci—cipròfetà citàngile yéyè muntu ewu, nè kufilayè cipròfetà kampàndà nè cintu kampàndà civwa mwà kwenzekela muntu awu cyà cimpè mu matùkù makesè àdi àlondà aa, anyì cintu kampàndà cyà mùshindù awu. Ke muntu awu kubiikilayè ku tèlefonè è kwambayè nè muntu ewu, kùdi matùkù makumi àsambòmbò nè mwandamukùlù mpindyewu, ùkaadi mupàtùke mu lùpitaadi, kí mmunwè maalà nànsha makesè, anyì mwangàtekù bwanga kampàndà bwà kumupangisha kunwà maalà, anyì ní ncinyì cyònsò to. Nènku cintu civwà Mwanèètù Neville mwambè mu cipròfetà aci ncyenzèke. Mukalenge àtumbè! Tudi twitabuuja nè mwanèètù wa balùme ewu ùdi mulùme wa Nzambì.

**Mwanèètù Branham munanga, ng'aba bàdi . . . ?**

<sup>184</sup> Mpindyewu indilaayi, ngànji kwimanaku kakesè mwaba awu. Mpindyewu, ke cìndi nteeta kwambila bantu ncyòci aci. Mwanèètù Neville ùdi witabuuja Mukenji wùm wèwùm wè wùndi mèmè ngiitabuuja ewu. Mwanèètù Capps, Mwanèètù Beeler, Mwanèètù Ruddell, bânà bèètù bònsò bàà mu nyùngulwilu emu aba bàdi biitabuuja Mukenji wùm wèwùm wè wùndi mèmè ngiitabuuja ewu; bàdi bà Wùyiisha, mùshindù wùm wèwùm wè wùndi mèmè nyiisha ewu.

<sup>185</sup> Kàdi wèwè muswè, muswè bulelèlèlè, wèwè mwikàle nè dijinga dyà kumwangala, nè nebikengele wèwè kwangata mikàndà yèbè yà dijika dyà mudimu anyì cìngà cintu, kàdi muswè kulwa bwà Dìyì, lwàku mùnwemu. Lwàkù ku tabernacle ke mwaba wùdi uWùmvwila.

<sup>186</sup> Aba mbantu bàà difwànà dyà Nzambì. Mbantu bàdi nè Nyumà Mwímpè umweumwe ùndi nendè nè—nè unùdi nendè ewu, bàlongeshila mu Bible umweumwe nè Mukenji wùm wèwùm wè awu.

**Mwanèètù Branham munanga, ng'aba bàdi bààkulà mu myakulu ke bàshààdilè abu anyì . . . ?**

Èyo, nkàadi mwandàmùne alu. Uh, huh, ndi mulwandàmùne, pa dyakula dyà mu myakulu.

**Mwanèètù Branham, diyiisha dyèbè pa dibàtiiza dyà Nyumà Mwimpè, ndibàtiiza mu Dìna dyà Yesù anyi . . . ?**

Èyowà, ndi mwanàmùne alu. Tùmonèbi tǔng.

**429. Mwanèètù Branham, Bible ùdi ùtwàmbila nè bìvwà bìkèngela bwà—bwà mukàji kutùmikilayè bàyendè. Mémè ndi mwena Kilistò nè bàyaanyi ùdi ngènzàmpèkààtù. Yèyè ùdi ùnkèngesha mu mùshindù wònsò wùdiye mwà kwenza, nè bwà ncìikadi nya mu èkèleeziyà, nè ncìikadi mbala Bible wanyì to, nè—nè yèyè ùdi ùvila Dìyi. Bìvwà bìkèngela mémè kwenza cinyi?**

<sup>187</sup> Bìvwà bìkèngela wèwè kwenza cinyi? Mpindyewu, tèelejàayi, udi nè cyà kutùmikila bàyeebè; aci's ke Dìyi. Mpindyewu, yèyè mukwambile nè ùkubèngela bwà wèwè kubala Bible, kuya mu èkèleeziyà, anyi cintu bu nàнку, kabyèna bìkèngela bwà wèwè kutùmikila aci to, bwalu: “Ewu wabènga—wabènga kulekela tatwendè, mamwendè, bàyendè, mukàjèndè, anyi cyònsò cidici aci nè kundonda Mémè, kí mmunkùmbànyine Mémè to.” Ncyà bushùwà anyi?

<sup>188</sup> To, kwìkadi . . . Balùme mbenzèjìibwe . . . kwènà . . . Mulùme kèna nè cyà kukwàta mudimu nè bukòòkeshi abu pa mukàji ànu nè mbwalu yèyè mmukòòkeshi wendè to. Nzambi ngudi mukòòkeshi wa mukàji awu kumutù kwèbè, mwanèètù. Nwamònu anyi? Nèнку pìikalà webè mukàji wènza cintu kampàndà cyà cibi, díbà adi kwìkadi . . . díbà adi udi nè bukenji bwà kumwambila, nè yèyè ùdi nè cyà kukutèeleja. Kàdi kwèna nè bukenji bwà kumutuuta, anyi kumupulumuna wátwà nèndè kwàka nè eku to, anyi—anyì kwenza bintu abi to. To! Yèyè . . .

<sup>189</sup> Nzambi wàkenzela balùme mukwàcishi, kí ncikùpwiidi cyà makàsà cyà ku ciibi to. Vùlukàayi nè, yèyè mukàji awu ùdi . . . Yèyè's ùvwa munanga webè; bìvwà bìkèngela bwà kwikalayè misangu yònsò ànu nàнку.

**430. Ndìbà kaayi nè mpenyi pìikalà bantu bàà Nzambi nè cyà kudisangisha bwà Dìyi dyà ndekeelu?**

<sup>190</sup> Mu Kilistò. Èyowà! Bwà ditùkù dyà ndekeelu, nebàdisangè mu Kilistò. Kanùpu aci mwoyi mpindyewu to. Tudi nè mwaba wà didisangishila; tudi naawù ànu menemene.

**431. Tudi babìikidiibwe . . . (Mpindyewu, lukonko alu ndwòlù elu ditùkù adi.) Tudi tubìikidiibwa nè nyuunyi mikooyike, bwalu tuyàaya mu èkèleeziyà wa Junior Jackson. Misangu mikwàbò bwalu tudi nè—nè . . . Yèyè kèna ùkumbaja tunungu tupyatùpyà twà èkèleeziyà ewu mu èkèleeziyà emu to. Tudi bapàtùke mu diswa dipwàngàne dyà Nzambi bwà kuyamù ku misabgu anyi?**

<sup>191</sup> To, mukalenge! Mémè ndi ngiitabuuja nè Junior Jackson mmuntu wa Nzambi. Nkààdi mumanè kucyùmvwija. Ndi ngèela meeji . . .

<sup>192</sup> Mpindyewu, katwèna tupetangana pa bulongàme bwà èkèleeziyà to. Mpindyewu, ndi ngiitabuuja nè Junior ùdi—Junior. . . Mbwà cinyi yèyè. . . Mbanganyi bàdi bamanyè Junior Jackson? Mòna's, tudi bamanyè nè muntu awu mmuntu wa difwànà dyà Nzambi. Yèyè udi witabuuja Mukenji ewu ànu mùshindù wùm wèwùm wè wùndi mèmè ngwitabuuja ewu, nè yèyè ùdi witabuuja bintu ebi. Bwà kwamba menemene, Junior nè mèmè tudi ànu baanyàna, ànu mùdi bakwàbò bantu kaaba aka emu, J.T., nè—nè Mwanèètu Ruddell, nè Mwanèètu Jackson, nè Mwanèètu Beeler, nè bânà bèètù bônso bàdi kaaba aka aba; twètù bônso, tudi pàm wè. Mpindyewu, katwèna. . . tudi bafwànyine kupanga kumòna ànu menemene dísù ku dísù mùshindù wà mwòmùm wè (nwamònu anyi?), kàdi tudi twitabuuja Mukenji wùm wèwùm wè ewu (nwamònu anyi?), nè tudi baswikàkàne pàm wè. Kùdi Mwanèètu Humes kuntu kwàka, mpàndàn jilà, nènku kaa, bantu bashiilèshiiàngàne búngi cyanààna abu, mèmè. . . Míngà misangu ncihu nànsha mpeta mpùngà wa kutèèla mènà àbò to, kàdi nudi—nudi bamanyè nè ndi nswa kukwamba wèwè mwanèètu wa balùme, nànsha bishi. Ncyà bushùwà.

### Udi muswè kulekela mudimu wà bumungàngà . . .

<sup>193</sup> Mèmè kukonka aci. Wávùluku anyi? Mmwanèètu wa bakàjì munanga udi muswè kumanya pa bìdi bitàngila dyondopangana.

**Pàncìvwà mwàna mukesè apu, mvwa. . . mwambile bantu bônso nè mvwa muswè kwikala muiishi.** (Nkàadi mwandàmùne alu. Nkàadi mwandàmùne alu kàbidì.)  
**Pashiishe ncinyi cidiye mufwànyine kwenza bwà leelù ewu?**

<sup>194</sup> Èè, ewu mmukàndà mufùnda kùdi mu—mwambi kampàndà mwena mudimu bwà Kilstò, udi kàyì. . . Cidi ànu mukàndà mumfùndila mèmè nkààyanì. Ngwà kùdi Mwanèètu Pat Tyler, umwe wa ku bânà bèètù bàà balùme mu èkèleeziyà emu.

Ke yònsò nyòyì ayi. Twasàkidila kùdi Mukalenge. Ndi nè kusàkidila kunùdi nwènù. Ndi ngàngata ànu. . . [Katùpà kàà mukàbà wà mèyì munda mutupù—Muf.]

. . . tudi umwe,

Busàmbi bwètù nè dikòngangana dyètù.

<sup>195</sup> Ndi ndikonka Mwanèètu wa bakàjì Wilson ní ùcidikù mu nzùbu emu? Mvwa mumumòne kaaba aka. Udi mumanyè cìmvwà ngèna kùkaadi katanci anyi, Mwanèètu wa bakàjì Wilson? Mvwa mbandila fòtò ayi patwàkatèèkà dibwe dyà mu ditumba. Mèmè kutàngila fòtò nè kumòna Hope nè mèmè kumpàlà kwà twètù kusèlangana. Nciwva nànsha mumanyè nè. . . Ndi mvùluka pàmvwà mmòna fòtò kampàndà pangààkapàtuka mu yimwè yà ku mvità yànyì, pangààkacimunà mvità yà ditembangana dyà makàndà. Mvwa mutàngile fòtò wanyì dilòlò adi pàmvwà mukùbi wa nyama yà mwitu

munwemu mu Indiana emu. Ke mèmè kwela meeji bwà èkèleeziyà. Nudi bamanyè's, ngèèla meeji nè kakwènakù muntu nànsha umwe udi musòmbe kaaba aka dilòlòlò edi wa mu kòkù kasùmbu aku udi mushààle to. Mbanganyi kaaba aka bàà kuumukila ku cikondo cyà díbà ditwàkatèèkà dibwe dya mu ditumba kale wàwa ku cibangidilu? Elà cianza cyèbè muulu.

<sup>196</sup> Mwanèètù wa balùme, Mwanèètù wa bakàji Wilson, ndi muswè bwà nwènu—bwà nnùkonkèku nwènu bibidi cintu kampàndà. Nudi bavùlùke mutwàkatwàdijà bònsò anyi? Nudi bavùlùke panshi pàà cibambalu cyà kale aci pàvwàci cyònsò cyùlè tèntè nè bitoci anyi? Tuvwa nè màdidiishi à kale àvwà ànyùkuka. Tuvwa nè tuumeeyà makumi mwandamukùlù bwà kukàbanga naatù. Mushiki munène wà malèngà, byònsò ebi bìvwa ànu diitu bu mùdi paanyimà pèètù apa patwàkamwibakà, tabernacle ewu.

<sup>197</sup> Tàngilàayi bònsò bàà kutùdi twètù bààkenzà malaya ètù nè kunyùnguluka ku cyoshelu eci. Twàkabàmòna bàbwela bàya, ewu nè ewu. Nukàadi bamòne aba bàvwà bashààle nè Mukenji abu, mwàkayàbo anyi? Mpindyewu, elàayi meeji bwà aba bàdi buumùke ku Mukenji abu, mwàkayàbo. Elàayi meeji pa bwalu abu.

<sup>198</sup> S'ki twètù aba dilòlòlò edi, paanyimà pàà kasùmbù kònsò kàvwà katàmbe búngi butùdi kaaba aka ebu misangu yisàtù mpindyewu mu masangisha ètù àdi matàme kùla aa. Elàayibi meeji tǔng, pàvwà bisè yà bilongelu mifwànyine kwimana mu nyùngulwilu wa ditùnga dijimà emu yùmukila nseke yònsò, ku ditengu nè ku dikwàbò dya lupangu elu. Bàvwa bààdijà too nè nntentà kuntu kwàka bwà kubàkùba, nè nànsha nàнку kanùvwakù mwà kusòmbesha bantu mwaba nànsha wùmwe to, bàdisangisha kaaba kàmwe. Ncicìvwa ànu muyiishi wa nsongaàlùmè. Nwamònu anyi? Nènku mu binunu byònsò bitùvwà naabi abi amu, kùdi ànu bàsàtù bàà ku twètù bàdi bashààle mwab'ewu dilòlòlò edi.

<sup>199</sup> Ndi mvùluka Mwanèètù wa bakàji Wilson mwaba awu pangàakabiikidiibwà ku mutù kwà bulààlù bwèndè mwikàle ùpùnga nè lufù nè disaamà dya cyàdi, dya mashi àzòlòloka, mu mùshindù wà nè draps nè bilàmbà byà mu musàamu bìvwa bìsanganyiibwa, biikàle nè mashi, mu ditumba amu. Ndi mvùluka mùvwà Nyumà Mwimpè mwimanyike mashi. Ndambù wa matùkù paanyimà mèmè kumubàtiiza mu Musùlù wà Ohio mu màyi makwàte mabwe mu Dìna dya Yesù Kilistò, nè kumusòmbesha paanyimà pàà nkwasà wa kàshinyi kàanyi kakàngula, kaa roadster kakesè kàà kale, kàdi kumwendesha mu kàshinyi amu kuumukila ku Utica . . . Kacìvwa cyà bushùwà anyi? Kuumukila ku . . . [Mwanèètù wa bakàji Wilson ùdi wàkula nè Mwanèètù Branham—Muf.] Èyo! Mwanèètù wa bakàji Hope, mukàjàanyi, mwanèètù wa bakàji wàwa, ùvwa usanganyiibwa mu nkwasà wa kumpàlà kwà kàshinyi kakesè kàà roadster aku,

nè mààmù wanyì nè Mwanèètù wa bakàjì Snelling basòmbe mu ndekeelu amu. Ndi nè fòtò wabò, Mwanèètù wa bakàjì Snelling, Maman, nè bônso abu, Màndàmù Weber, Màndàmù . . . màmwènàànyì, twètù bônso kuntwaku, nè Meda, muciiikàle ànu mwànà wa bakàjì mutekète mwimàne pambèlu apu, nènku mpindyewu, ùkaadi mukàjì wa mvya. [Mwanèètù wa bakàjì kampàndà ùdi wàkula nè Mwanèètù Branham]

<sup>200</sup> Ndi mvùluka cikondo cìwàbo nè ditùkù dyà kusùmbisha tutaata tukesè bwà kupeta mfrangà yètù yàkumpàlà. Nènku ndi mvùluka Hope mwimànyine mu ditumba. Yèyè ùcìwva ànu mwànà wa bakàjì wetù ewu, wa wipacila ku bidimu dikùmi nè bisambòmbò; ùwva ùsùmbisha mùshindù ewu, mukwàte kataata aka. Ùbàpeesha kataata. Nuvwa mwà kutèekamù . . .

Muntu mukwàcìke maalà kupwekayè nè mùsèsèsù; kwambayè nè: “Mfwilèku luse, Mandemwazelè!” Yèyè nè: “Cyùdi usùmbisha ncinyi?”

Yèyè nè: “Nànsha cìmwè. Pa nànkù mémè ndi nkupèesha citaata eci.” Yèyè nè: “Ndipà dyà budiswìlè bwà èkèleeziyà. Pawikalè muswè bwà kwela cintu kanà cyònsò muntwemu bu dipà dyà budiswìlè, tudi tuteeta kupeta mfrangà búngì bukùmbàne bwà kwibaka tabernacle kampàndà bwà . . .mu cimenga emu.” Yèyè nè: “Wèwè muswè kwela cintu kanà cyònsò, udi mwà kwelamù, kàdi bu . . .”

Yèyè nè: “Ncyèna nè kantu nànsha kàmwè to.”

Yèyè nè: “Angata citaata nànsha bìshi.” Kwangatayè è kucitàngilayè. Ku luseke lùmwè lùwva lwàmba—lwàmba—lwàmba nè: “Neùpicishilè Cyendèlèlèlè penyì?” Nè ku luseke lùwva lùlondà kùwva cikonkelu. “Neùpicìushilè cyendèlèlèlè cyèbè penyì? Lukonko.

Yèyè kutètuka kwalukila cyànyimà; è kucitàngilayè, kwamba nè: “Màndèmwànzèlè, udi wela lukonko lwà musinga mukolè be!”

Yèyè nè: “Kàdi’s cìdi nè cyà kulongolodiibwa!” Ncyà bushùwà. Yèyè’s mmuyè dyàmwàmwà dyà rìdò dilòdòlò edì. Ndi mvùluka mèyì à ndekeelu àkambàye. Ndi mvùluka cìngààkamwambilà; ndi mucivùlùke. Èyowà’s, mukalenge!

<sup>201</sup> Màyi àbúngì àkapweka nè musùlu. Kale wàwa tuvwa twimana . . .Nè kumpàlà mene kwà twètù kupeta èkèleeziyà, tuvwa nè ciibidilu cyà kwimana nè kukwàtangana ku byanza nè kwimba musambu ewu kaaba aka. Ndi ànu mwà kuwùmvwa. Myrtle ùcìwva mwànà mukesè cikondo aci. Mvwa nè fòtò wa mwànà mukesè Leroy mwimàne pambèlu pààpa, ùcìwva ànu kàtòtù nànkù awu.

Mwonjì wùdì wùswìkakajà ùbeneshiibwè  
Myoyi yètù mu dinanga dyà bwena Kilistò;  
Bwobùmwe bwà meeji à buuwetù

Mbufwàràngàne nè bwà ku dyulu.

202 Patùdi tuwimba kùdi bààbùngì bàà kùdìbo bindile kwàka bwà dilwa Dyèndè.

. . . tudi tutàpuluka,  
Cìdi citùpèèsha lutàtù lwà munda; (Nudi banangàngàne muntu nè mukwèndè mùshindù awu anyi?)  
Kàdi netwikalè ànu baswikàkàne mu mwoyi,  
Nè batèkèmène bwà twàtwilanganakù cyàkàbìdì.

203 Mwanèètù Fleeman, udi pabwípì apu, kî mmwômò anyi? Mvwa ànu munkaci mwà kwela meeji, ngàkakumanya cikondo citwàkaya kwà Mwanèètù Roy. Udi muvùlùke ba Adcocks anyi? Mvwa nè Kenneth. Dìna dyà mwanààbò wa bakàjì ùvwa nganyi? [Mwanèètù Fleeman ùdi wàkula nè Mwanèètù Branham—Muf.] Ndi nè fòtò wabò; tuvwa biimàne bònsò pambèlu pàapa bajìngilàngane mabòkò, kumpalà kwà nzùbu awu, Docteur Roy E. Davis, mpaasàtà. Mvwa mumutàngile kùkaadi katanci. Doc nguvwa mutwàle maafòtò à kale awu. Kwenzaci bu nè ndyúm vwe bibì munda emu. Mpindyewu aci. . . bàbùngì bàà kùdìbo bàkaadi bayè (nwamònu anyi?)—bayè. Kabyàkunènga ntàntà mule katùyì bayè to. Nwamònu anyi? Kàdi. . .

Kàdi patùdi tutàpuluka,  
Bìdi bitùsaama ku mwoyi;  
Kàdi netwikalè ànu baswikàkàne mu mwoyi,  
Nè batèkèmène bwà twatwilanganakù cyàkàbìdì.

204 Nudi bavùlùke Mwanèètù Bosworth anyi? Ànu kumpalà mene kwà yèyè kusabuka, wàkajuuka kuulu mu cibambalu amu, kutàmbàkanayè panshi apu, nè kulabulanganayè ku cyanza nè tatwèndè, nè mamwèndè, bàvwàye mukùdimwishe mucima kùdi Kìlistò. Bidimu makùmi ànaayi, bàkaavwa bafwè kùkaadi bidimu makùmi ànaayi anyi makùmi àtaanu. Yèyè wàkabàmòna biimàne mwaba awu mu cibambalu amu, ùteeta bwà kufikisha bantu bònsò ku dibàmòna. Cìvwa ncinyi? Mukùlumpè awu ùvwa munkaci mwà kuya mu ditùnga adi mùm vwa nsanganyiibwa mu cikèènà-kumòna mu dindà amu. Ncyà bushùwà.

205 Mèmè kubàmòna kuntwaku; bàvwa cyàkàbìdì bansòngà. Tucidi ànu baswikàkàne mu mwoyi; tudi tutèkemena bwà kusangila cyàkàbìdì. Ncyà bushùwà. Nzambi ànùbènèshè.

206 Kwenzekabi nè ntapè dísù mu nzùbu emu, ngàakula bwà balundà bàanyi bàà bafiike, nè ndi cyà bushùwà mmòna Mwanèètù wa balùme nè Mwanèètù wa bakàjì Nash bàdi basòmbe paanyimà pàapa bàba. Ncìvwa mumanyè nè nuvwapù to. Ndi mwenzè ànu nè ntàngilà paanyimà; bàdi lwà paanyimà. Nè mwanèètù wa balùme mukwàbò udi musòmbe lwà apa ewu. . . Ke mwanèètù utu ungeela lubilà lukolè lwà paanyimà

pàapa ku musangu nè musangu, udi musòmbe lwà mwaba ewu anyi? Ncyèna mwà kuvùluka dìnà dyèndè to. Mwanèètù Wood kwambayè nè ùvwa wàkula nendè. Yèyè nè: “Udi mumanyè anyi? Pàdi Nyumà ùndenga, bikèngela ngèlè lubilà nè ‘È!’” Yèyè nè: “Ndi ntèkemena nè ncyèna ntàcishe kantu nànsha kàmwè to.” Paùdi kùyi wela lubilà nè “È!” to aci cidi cintacisha be. Nzambi àkubènèshè. Ndi mukunangè mwanèètù wa balùme, mwanèètù wa bakàji. Ncyà bushùwà.

<sup>207</sup> Mwanèètù wa balùme Nash, Mwanèètù wa bakàji Nash, nudi bamanyè nè ndi munùnangè. Èyowà’s, mukalenge! Nudi bàna bèètù wa balùme nè wa bakàji mu Kilistò Yesù.

<sup>208</sup> Balundà bàanyi bàà kalolo bàà mushinga mukolè, anyi muntu yònsò mukwàbò, pìikalàbi nè mvwa mupangile umwe wa kùdibo, ke biibi ebi byunzulula mwab’ewu bwènù nwènù. Biibi byà Dyulu nebi kangudiibwè pàabi.

Kàdi netwikalè ànu baswikàkàne mu mwoyi,  
Nè batèkèmène bwà twàtwilanganakù  
cyàkàbìdì.

Dyànyì . . .

*Ditabuujà Dyànyì Nditangile Kùdì*, mpindyewu, patùdì twimba apa. Tuwimbàayi musangu mukwàbò umwe mpindyewu. Dìbà dyàkànyì dyà kwalukila kumbèlu mpindyewu.

Ditabuujà dyànyì nditàngile Kùdì,  
Wèwè Mwànà wa mùkòòkò wà ku Kàlvaryò,  
Èyì Musùngidi wa kùdì Nzambi!  
Mpindyewu ngumvwilèku pàndì nsambila apa,  
Umùshàku mpèkaatù yànyì yònsò,  
Èyì anyishàku bwà kuumukila ku leelù ewu  
Mémè yònsò ngùikalè ànu Webè!

Tùteetàayibi cyàkàbìdì *Wa cijila, Wa cijila* awu, kí mmwómò anyi? Tùpèèshèku cyonà, Mwanèètù wa bakàji. “Kaa . . .” Nudi bawùmanyè anyi? Nudi bavùlùke pàvwà Mwanèètù wa bakàji Gertie nè bakwàbò abu nè ciibidilu cyà kuwimba apu anyi?

<sup>209</sup> “Ditùkù dikaadi dyènda dibwela ku wesètè; Dyulu ndibènèshe buloba, buloba mbubènèshìibwe.” Mùshindù mwinè, bu dibwela dyà dìbà dyà dilòòlò, dipweka, nyuunyi yenza dibìikila dyàyi dyà ndekeelu, aci cidi nè cyà kulwa kùdì yònsò wa kutùdì dìbà adi. Ndi ngèèla meeji nè pa dìbà dyà dilòòlò, nukàvwakù bamòne anyi? Lupeepèlè nelùlekelè kutuuta, nyuunyi neyìpuwè. Nwamònu anyi? Mbùloba bùdi munkacì mwà kufwà, ditùkù didi munkacì mwà kufwà bwà kulediibwadi cyàkàbìdì màalabà mu dindà. Èyo, tuciteetàayi mpindyewu twètù nè mùshindù:

Wa cijila, Wa cijila, Wa cijila, Mukalenge  
Nzambi Mutàmbe Bukolè.

Lee, anji bândilàku apa kakesè. Ndi—ndi—ndi ngùtabuuja nè ncyèna—ncyèna ngèèla meeji nè ndi mucimanyè mu cyonà aci to. Ngǎnjì ncìteetè kakùyi mùjikì awu. Nwamònu anyi? Tùmonèbi ní tudikù mwà kucipeta. Mpindyewu, ndi mumanyè... Ndi mwà kwikala ncimba bibi. Nwamònu anyi? Nkwàcishaayikù mpindyewu, muntu nè muntu wa kunùdi, mpindyewu.

Wa cijila, Wa cijila, Wa cijila, Mukalenge  
Nzambi Mutàmbe... bilwilu.  
Dyulu nè buloba mbyùle Neebè tètè,  
Dyulu nè buloba bìdi bìKutùmbisha,  
Éyi Mukalenge Mutàmbe bunène wa mu  
Dyulu!

Nudi banangè aci anyi? Aci kaciyèna cikwenzela cintu kampàndà anyi? Tùcìteetàayibi cyàkàbìdi:

Wa cijila, Wa cijila, Wa cijila, Mukalenge  
Nzambi Mutàmbe bunène wa mu Dyulu!  
Dyulu nè buloba mbyùle Neebè tètè,  
Dyulu nè buloba bìdi bìKutùmbisha,  
Éyi Mukalenge Mutàmbe bunène wa mu  
Dyulu!

<sup>210</sup> Mémè ntu munangè aci, kàdi nwènù? Kaa, ntu munangè ànu misambu mimpè yà kale ayi. Kùdi cintu kampàndà pa bìdi bitàngila misambu ayi cintu munangè. Nudi mwà kwangata tuumisambu twènù twònsò tukòsòlòke tunùdi mwà kuswa atu. Mpèèshaayi aci; mémè ntu muswe aci. *Mpicila Cibwikilu Cipandùbwe*, misambu mikwàbò yònsò ya milenga ayi mùshindù awu; mémè ntu munangè misambu ayi. Ndi ngèèla meeji nè dimba dyà misambu didi citùpà cyà dikuukwila (èyowà's, mukalenge!), dimba dyà butùmbi kùdi Mukalenge.

<sup>211</sup> Èyo, bwà ditangalajangana dyètù, mpindyewu, musambu ewu wà nè: *Angàtà Dìna dyà Yesù Wèndè Naadi*. Mukalenge ànùbènèshèku mpindyewu patùdi tujuukila kuulu apa.

Angàtà Dìna dyà Yesù wèndè naadi,  
Mwànà wa kanyinganyinga nè dikènga;  
Nedikupè disànka nè busàmbi,  
Kaa, nda naaDì kwònsò kùyaayà.

Dìna dyà musinga, Éyi dyà bupòle be!  
Ditèkemena dyà buloba nè disànka dyà Dyulu;  
Dìna dyà musinga, Éyi dyà bupòle be!  
Ditèkemena dyà buloba nè disànka dyà Dyulu.

Mpindyewu eci ke citùminyì ncìndì muswè, nè cìdi didìmwija kunùdi nwènù bònsò mpindyewu. Cyùdi wenza ncinyi?

Angàtà Dìna dyà Yesù wèndè naadi,  
Bu Ngabu ku butèyi bwònsò; (Tèèlejàayi!)  
Pààkujìngà mateciibwa ku nseke nè ku nseke,  
(Udi nè cyà kwenza cinyi?)

Nungàná ànu cyanaààná Dìná dyà cijila adi mu disambila.

Dìná dyà musinga, Éyì dyà bupòle be!  
Ditèkemena dyà buloba nè disànkà dyà Dyulu;  
Dìná dyà musinga, Éyì dyà bupòle be!  
Ditèkemena dyà buloba nè disànkà dyà Dyulu.

Twìnyikààyi mitù yètù mpindyewu.

Too nè patwàsangilà! too nè patwàsangilà!  
Too nè patwàsangilà ku makàsà à Yesù; (Too nè  
patwàsangilà!)  
Too nè patwàsangilà!

[Muntu kampàndà ùdi wàmba nè: “Udikù mwà kumvùluka mu disambila anyi?”—Muf.]

Mukalenge Yesù, bèleshàku mwanèètù wa balùme munanga, nè mondòpàku mpindyewu mu Dìná dyà Yesù. Enzàku nànkù, Mukalenge. 🐦

64-0830E Nkonko Nè Mandamuna #4  
Branham Tabernacle  
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)